

YOHAN É SHING-RÁN

Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wui lé tân shit nhâng râ matú, Garai Gasâng eq Yesuq Hkrisduq Yhang lé byî tô é nghut lhê. Yhang gi, Yhâng é maumang lagyo lé nhang kat luî, Yhâng é dui-nhâng zoshâng Yohan lé, shing-rán haû sé nhang ri.

² Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri.

³ Haû ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luî, haû má kê tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyi chyáng mai le,

⁵ lhumzuî é saksé nghut sù, shi byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai

le, jeju eq nungón hkyô gi, nungmoq chyáng joq nyí sháng gaq.

Nga-nhúng lé chyitdap luí, Yhâng é suí èq, nga-nhúng lé, nga-nhúng é mara pé mai lhoq lhut byí é eq,

⁶ Yhâng é Garai Gasang eq Íwa lé dojaú râ matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut luí, myoqjí hkangmó gi, Yhang lé myàng kó râ nghut lhê;

haû Yhang lé htaû rot bang† lháng, myàng kó râ nghut lhê;

haû myidàm htoq mâ é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haú dông nghut sháng gaq! Amen.

⁸ "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sû nghut lhê." ga, haû Yhumsing Garai Gasang taí ri.

Byu Yhangzo Su Dut Su É Hkyô

⁹ Yesuq é, wuîhke jamjau hkyô má le, mingdán má le, jân shirang é hkyô má le, nungmoq é by-inzùm nghut sù, ngò nungmoq é gumang hpó,

* **1:6** Htoq Ló 19:6 † **1:7** Htau rot bang gâ é gi, Yesuq tapzîng má jén to hui é hkûn, Yhâng é namcham má lham èq htaû é bang lé gâ lhê. ‡ **1:8** Alhpa eq Omega gi, Grik laiká myhí mâ é sâng-hí cham eq ló htâng cham nghut lhê; haû taí nau é gi, rû dui nyi sù gâ é nghut lhê.

Yohan gi, Garai Gasâng é mungdang eq Yesuq é saksê é yanmai, Patmo zinlóng má nyi nyi é nghut lhê.

¹⁰ Haû Yhumsing é Buinyi§ má, ngò gi, Woi-nyí eq shuí moq byuq ló é nghut mù, "Nàng myang é eq rajung za, chyúmding ralhüm má ká luí, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é,

¹¹ noqkuq hpúng nyhit lhûm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haû ngo lé nyo nyi é htê yhumsîng lé wú râ matú, ngò, gùng lhing kat é nghut lhê. Ngò gi, gùng lhing kat é hkûn, hîng myi-kok tsungjang nyhit lhum lé le,

¹³ myi-kok tsungjang haú pê é agùng má, byu yhangzo su dut é Sû rayuq nyi tô é lé le, myang kat ri; haú yuq gi, hkyigoq htoq jé é buhîng wut to luí, wànggàng má hîng wànggò le wut tô ri.

¹⁴ Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjí gi, myishâm su duq nyi ri.

¹⁵ Yhâng é hkyî gi, myi bungghkyûng má jên yu é jet é gyi su dut ri; Yhâng é htê gi, wuì myo myo mying hûm é htê su gâ ri.

¹⁶ Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng buì su tso nyi ri.

¹⁷ Yhang lé myang é hkûn, ngò gi, shî gùng su, Yhâng é hkyî wang má lêng leq tô é nghut lhê. Haú

§ 1:10 Yhumsing é Buinyi gâ é gi, yuban nyi lé gâ lhê.

hkûn, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtûm nghut lhê.

¹⁸ Ngò gi, dui nyi Sû le nghut lhê; Ngò gi, shî bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shî hkyô eq momîng é zoqshi pé lé chúng Su nghut lhê.

¹⁹ Haû mù, nàng myang é lé le, ahkui dut é hkyô eq htângnùng le dut lò râ hkyô lé le, kê to aq.

²⁰ Nàng myang é, Ngá é loqyo loq mâ é kyî nyhit cham eq hîng myi-kok tsungjang nyhit lhûm é zaú tô é hkyô é lichyúm gi, isu nghut lhê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

2

Ehpesu Myuq Mâ É Noqkuq Hpúng Lé Kâ Kat É Laiká

¹ Ehpesu myuq mâ é noqkuq hpúng é maumang lagyo lé isu nghû kê kat aq:

Haû yhâng é loqyo loq má kyî nyhit cham chúng luí, hîng myi-kok tsungjang nyhit lhûm é gyoro má sô nyi Su é dang gi,

² 'Ngò gi, nàng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haû lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kê é hkyô lé le, Ngò sê lhê.

³ Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, nú byuq é hkyô a bò nghut ri.

⁴ Nghut kôlhang, nàng gi, náng é sâng-hi lhê é chyitdap myit lé tô pyâm é yanmai, ngò, nang lé mara hûn râ hkyô joq ri.

⁵ Nàng hká mai byit gyó é lé, myit bun aq! Myit lêng luî, sâng-hi nàng kut é muzó pé lé, kut aq. Nàng myit a lêng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huî pyám byi râ nghut lhê.

⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhum bo ashî nghut ri.

⁷ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sù lé gi, haû Garai Gasâng é hparadisu má joq é asak siggâm mâ é ashi zo râ ahkáng, Ngò byi râ nghut lhê.' gâ ri.

Samurna Myuq Mâ É Noqkuq Hpûng Lé Kâ Kat É Laiká

⁸ Samurna myuq mâ é noqkuq hpûng é maumang lagyo lé isu nghû kâ kat aq:

Haû Sâng-hi eq Jihtûm nghut é eq, shi byuq luî, asak dum dui Su é dang gi,

⁹ Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luî, Yudaq byu pé a nghut kôlhang, Yudaq byù nghut lhê gâ é bang taí hpoî é hkyô lé le, Ngò sê lhê.

¹⁰ Nàng hui zo râ nghut é wuîhke hkyô lé, hkâgyuq. Ngò, nungmoq lé taî kyo kôlé, haû nat Tsadán gi, nungmoq lé chyam wú é dông, nungmoq chyáng mâ é ra-am lé, htóng má hkyô pyám râ nghut lhê; hau htâng, nungmoq gi, raxê nyí tup zing-rî é hui zo kó râ nghut lhê. Shî shoq lhumzuí nyí aq, haú hkûn, Ngò, nang lé, asak janmaú byi râ nghut lhê.

¹¹ Gyo râ nohkyap dap sù gi, haû Woi-nyí mai noqkuq hpûng pé lé taî é hkyô lé, gyô yù sháng gaq. Í dâm nghû râ shi é hkyô* gi, wó ung é sù lé, wó záng htung râ a nghut.' gâ ri.

Pergamu Myuq Mâ É Noqkuq Hpûng Lé Kâ Kat É Laiká

¹² Pergamu myuq mâ é noqkuq hpûng é maumang lagyo lé isu nghû kâ kat aq:

Haû shamsó í shut dap é shâm wó Su é dang gi,

¹³ 'Nàng nyi é jowò lé, Ngò sê lhê; haû gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myîng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzuí é saksé hpó Antipa sat huí é hkûn lháng, nàng Ngo lé lumjîng é hkyô lé, a he-ngik pyám nghut ri.

¹⁴ Nghut kôlhang, Ngò, nang lé mara hûn râ hkyô ratsuí joq ashî; hkâsu mù gâ le, hparà lhô pé lé tîng byî é zoshuq zô é eq, ashop é dông gungsho zùm yap é mara kut shut râ matú, Israelaq byu pé lé mhoq hpyoq râ hpaqchyî, Balak

* **2:11** Í dâm nghû râ shi é hkyô gâ é gi, ngaraí ming wang é lé gâ lhê.

lé mhoq byî é Balam é mhoqshit hkyô lé myhik zing é byu pé, náng chyáng nyi ri.

¹⁵ Haû eq rajung za, haû Nikola é chángzô pé mhoqshit é hkyô lé myhik zing é byu pé le, náng chyáng nyi ri.

¹⁶ Haû mù luî, myit lhîng aq! Haû a nghut jáng, Ngò gi, náng chyáng hân jé lé mù, haû Ngá nhut mai htoq é sham eq yhangmoq lé zan râ nghut lhê.

¹⁷ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myîng asik kê tô é luqgok hpyû racham lé le, Ngò byi râ nghut lhê, lhom hap yu é sù za sheq, myîng haû lé sé râ nghut lhê.' gâ ri.

Htuatira Myuq Mâ É Noqkuq Hpûng Lé Kâ Kat É Laiká

¹⁸ Htuatira myuq mâ é noqkuq hpûng é maumang lagyo lé isu nghû kê kat aq:

Haû myishâm su duq nyi é myoqjí eq jet é gyi su dut é hkyî dap é Sù, Garai Gasâng é Yhangzô é dang gi,

¹⁹ 'Náng é a-kyang, chyitdap myit, lumjîng myit, dojaú é hkyô, hkam jân é hkyô pé lé le, náng gi, hí lhê htoq má ahkuî je myô zui saí é hkyô lé le, Ngò sê lhê.

²⁰ Nghut kôlhang, yhumsing gùng yhumsîng myiqhtoi myhí nghut lhê gâ é myiwe Yezebulaq lé, náng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wuì lé, ashop é dông gungsho zùm yap râ eq hparà lhô pé lé tîng byî é zoshuq

zo râ hkyô lé mhoqshit luî, yhangmoq lé hkyô shuî nghoq ri.

²¹ Ngò gi, yhang lé, ashop é dông gungsho zùm yap é hkyô mai myit lhîng râ ahkyíng byi kôlhang, yhang gi, a myit lhîng naù nghut ri.

²² Haù mù, Ngò gi, yhang lé, jamjau hui râ yhupchong má dù lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhîng kô é za a nghut jáng, wuîhke jamjau mó hui zo nhâng râ nghut lhê.

²³ Ngò gi, yhang zô pé lé sat pyám râ nghut lhê; haù hkûn, Ngò gi, myit nhiklhum eq myit é hkyô lé sé Sû nghut é lé le, nungmoq kut é muzó eq rajung za, nungmoq yuq hkanmó lé, Ngò tau byi râ nghut é lé le, haù noqkuq hpûng pé banshoq wó sé kó râ nghut lhê.

²⁴ Mhoqshit hkyô haù lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò tai kôlé, nungmoq lé gotû wòlai Ngò jat byi râ a nghut.

²⁵ Ngò jé lé é jé shoq, nungmoq wó tô é lé za myhik zing nyì keq.

²⁶⁻²⁷ Wó ung é eq Ngò ô nau é hkyô lé jìhtûm jé shoq châng é sù lé gi,

"Yhang gi, yhangmoq lé, shamtoq dumbáng èq up†
râ nghut lhê;

Yhang gi, tso-au hkoq pé lé su, yhangmoq lé
bat hkyop pyám râ nghut lhê."[☆]

gâ tô é eq rajung za, Ngò, Ngá Wâ chyáng mai
ahko ahkáng wó yu é su, mingdán pé lé up râ

† **2:26-27** *Shamtoq dumbáng èq up* gâ é gi, ahko ahkáng banshoq wó luî, up é lé gâ lhê. ☆ **2:26-27** Hkya-on 2:9

ahko ahkáng, Ngò byi râ nghut lhê.

²⁸ Ngò gi, yhang lé, haû bó-myhû byi râ nghut lhê.

²⁹ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

3

Sardi Myuq Mâ É Noqkuq Hpûng Lé Kâ Kat É Laiká

¹ Sardi myuq mâ é noqkuq hpûng é maumang lagyo lé isu nghû kâ kat aq:

Haû Garai Gasâng é woi-nyí nyhit woi-nyí eq kyî nyhit cham lé chûng Su é dang gi, 'Ngò gi, náng é a-kyang lé sê lhê; nàng gi, asak dui nyí sù ga kôlhang, shi byuq sù nghut ri.

² Gyîng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri.

³ Haû mù, nàng hkâsu kut wó hap yu é eq wó gyô yu é hkyô lé, myit bun aq; haú dông cháng luî, myit lhîng aq. Nàng a bûn gyîng é nghut le gi, Ngò hkau sù su lé râ nghut luî, nàng gi, Ngò hká u lé râ lé, sé râ a nghut.

⁴ Nghut kôlhang, Sardi myuq má, yhumsing é mebu lé agot a-û a kut é byù ra-am nyi akô. Haú bang gi, hpyu é mebu wut luî, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô.

⁵ Wó ung é sù gi, haú bang su, hpyu é mebu myang wut râ nghut lhê. Ngò gi, haú yuq é myîng lé, hkâ-nhám le, asak jihpán laiká buk mai yu pyám

râ a nghut; hau htoq agó, Ngá Wâ é hí má le, Yhâng é maumang lagyô pê é hí má le, haú yuq é myìng lé, Ngò yín yû râ nghut lhê.

⁶ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Hpiladehpi Myuq Mâ É Noqkuq Hpûng Lé Kâ Kat É Laiká

⁷ Hpiladehpi myuq mâ é noqkuq hpûng é maumang lagyô lé isu nghû kâ kat aq:

Haú chyoyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhí é Su é dang gi,

⁸ Nàng kut é muzó pé lé, Ngò sê lhê. Wú aq, ó yuq le a wó myhí é hkum ralhum, Ngò náng hí má hpông to byí lhê. Nàng gi, wum-o ratsuí za bò kôlhang, Ngá é dang gyo luí, Ngá é myìng lé a hengik pyâm é hkyô lé, Ngò sê lhê.

⁹ Haú tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gâ é byù mhaú pé lé, Ngò, náng é hkyí wang má, lé paí gop nhâng luí, Ngò, nàng lé chyt-dap é hkyô, yhangmoq lé sé nhâng râ nghut lhê.

¹⁰ Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yû râ nghut lhê.

11 Ngò gi, a myáng má jé lé lô râ nghut lhê. Náng é janmaú lé, ó yuq èq le a wó yu pyám byi sháng gaq, nàng wó tô é pé lé myhik zing nyì aq.

12 Wó ung é sù lé gi, Ngá é Garai Gasâng é noqkuq yhùm mâ é hkungzing mó dut nhâng râ nghut lhê. Haú yuq gi, hkâ-nhám le haú mai dum htoq lô râ a nghut. Ngò gi, Ngá é Garai Gasâng é myìng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myìng lé le, Ngá é myìng sik lé le, yhâng chyáng kê tap byi râ nghut lhê.

13 Gyo râ nohkyap dap sù gi, haú Woi-nyí mai noqkuq hpûng pé lé tai é hkyô lé, gyô yù sháng gaq.' gâ ri.

Ladoki Myuq Mâ É Noqkuq Hpûng Lé Kâ Kat É Laiká

14 Ladoki wà mó mâ é noqkuq hpûng é maumang lagyo lé isu nghû kê kat aq:

Haú lhumzuí é eq tengmán é saksé nghut é, Garai Gasang hpan tô é lé up é, Amen gá Su é dang gi,

15 "Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jáng gú, nye jáng jáng nye dut râ lé, Ngò ô nau ri.

16 Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê.

17 "Ngò gi, wó sù nghut lhê; ngò gi, sutzè gyai wó bê nghut luí, haí lháng a ra lo." ga nàng tai ri. Nghut kôlhang, nàng gi, wuîhke jamjau hui sù, asho

awui dut sù, myùng sù, myoqjit sù eq achîn dut sù
nghut é lé, nàng a sé myhi-nhung.

¹⁸ Haû mù luí, nàng gi, wó sù sùt sù wó dut
sháng gaq, myi má jên yu é hîng lé le, nàng achîn dut
é hoq hpu hkyô lé, wó nghop pyám sháng gaq, wut
râ matú, mebu hpyû lé le, nàng myoq wó myâng
sháng gaq, náng é myoqjí má kat râ matú, myoq chi
lé le, nàng, Ngá chyáng mai wui yù râ matú, Ngò,
nang lé hpaqchyî byî lhê.

¹⁹ Ngò chyitdap é bang lé gi, tan luí, mhoqshit
lhê. Haû mù, nàng gi, hân bûn gying luí, myit
hîng aq.

²⁰ Wú aq! Ngò gi, hkum yâm má yap to luí,
hkum lé kok nyi lhê. Rayuq yuq, Ngá é htê lé wó
gyo luí, hkum hpóng byî é nghut jáng, Ngò gi, wàng
mù, haú yuq eq rahá zo shuq râ nghut lhê, haú yuq
le, Ngò eq rahá zo shuq râ nghut lhê.

²¹ Ngò gi, ûng luí, Ngá Wa eq rahá Yhâng é
hkohkâm-tanghkuq má zung é eq rajung za, wó
ung é sù lé gi, Ngò eq rahá Ngá é hkohkâm-
tanghkuq má zùng râ ahkáng, Ngò byi râ nghut
lhê.

²² Gyo râ nohkyap dap é sù gi, haû Woi-nyí mai
noqkuq hpûng pé lé taí é hkyô lé, gyô yù sháng gaq.
'gâ é nghut ri." gâ ri.

4

Mauhkûng Htoq Má Hkohkâm-tanghkuq Joq É Hkyô

¹ Hau htâng má, ngò wú kat le, mauhkûng má
hkum ralhum bóng tô é lé myang ri. Ngò sâng-hî
dàm wó gyô é tut htê su gâ é danghtê ngo lé taí é gi,

"Shî má doq lò aq, htângnùng má dut lò râ hkyô pé lé, Ngò, nang lé tûn shit bá." gâ ri.

² Haú hkûn jáng yhang, ngò gi, Woi-nyí má moq byuq ló luî, mauhkûng htoq má hkohkâm-tanghkuq ralhum joq é lé myàng ri; tanghkuq haú má, byù rayuq zung tô ri.

³ Haú má zung to Su é isâm gi, huhpé eq ne yúng lungsêng su dut ri. Huí nyuì lungsêng su dut é woqgan síng-yang gi, haú hkohkâm-tanghkuq má hkông lhîng tô ri.

⁴ Hkohkâm-tanghkuq hau é lhînghkyuq má, hkohkâm-tanghkuq gotû í xe myí lhum le joq to luî, hpyu é mebu wut mù, ulhum má hîng janmaú tsûng tô é suwún í xe myi yuq gi, haú má zung tô bum akô.

⁵ Haú hkohkâm-tanghkuq mai, lhap hpyat é, my-ing hûm é eq maugum gûm é pé dut htoq lo ri. Haú hkohkâm-tanghkuq hí má, myi-kok nyhit lhum le duq tô ri; haú pé gi, Garai Gasâng é woi-nyí nyhit woi-nyí nghut ri.

⁶ Hau htoq agó, san zâ é myoqjàm su dut mâ é wuì-nhông le, haú hkohkâm-tanghkuq hí má dîng tô ri.

Haú hkohkâm-tanghkuq agùng má le, lhînghkyuq má le, hî-u nunghtáng lhînghkyuq myoqjí dap é dui é dusak myí du nyi tô ri.

⁷ Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sîm du nghû râ dû é myoqdong gi, byu myoqdong su dut ri; myí du nghû râ du gi, dâng wún é zunbung su dut ri.

⁸ Dui é dusak myí du haú gi, du hkangmó dùng hkyuq lhum lhum dap é htoq agó, lhînghkyuq má myoqjí kôm dap luî, dùng hkaú má lhang dap ri.

Yhangmoq, nyí myín hkâ-nhám a no loshoq taí nyí kô é gi,

"A-nham pyat le, ahkuí pyat le, htang pyat má le,
rû nyi nyi é, haû wum-o a-tsam dik shoq bò
Sû Yhumsîng Garai Gasang gi,

chyoiyúng, chyoiyúng, chyoiyúng nyi ri."
gâ akô.

⁹ Haû dui é dusak myî du gi, hkohkâm-tanghkuq má zung é, pyat dedu ahtum abyuq dui nyí Su chyáng, hpungwup shingkang, aróng eq jeju bun hkyô byî é hkangmó,

¹⁰ haû suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyí Su é hí má, ngóm gop luî, Yhang lé noqkuq akô. Yhangmoq gi, yhangmoq é hkohkâm-janmaú lé, haû hkohkâm-tanghkuq hí má hkyut to mù, taí kô é gi,

¹¹ "Ngamoq é Yhumsîng eq Garai Gasang ê, nyí mi-nyí, joq mijoq lé, Nàng hpan to bê nghut luî, haú pé gi, Nàng ô nau é dông hpan tô é hui bê nghut mù, nyi to joq tô bùm bê nghut é yanmai, Nàng gi, hpungwup shingkang, aróng eq hpungwup a-tsam lé, hap yù gíng Sû nghut ri."
gâ akô.

5

Chyúmding Eq Sauzo

¹ Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri.

² Hau htoq agó, a-tsam mó bo é maumang lagyo rayuq gi, "Haû dizik pé lé hî pyám râ eq chyúmding

lé hpóng râ gi, ó yuq wá gingdán lhê lhu?" ga luí, htê mó eq wut taí nyi é lé le, ngò myang ri.

³ Nghut kôlhang, mauhkûng htoq má le, myigùng htoq má le, myigùng ô má le, haû chyúmding lé wó hpóng râ eq ahkaû má wó wú râ byù rayuq lhang a nyi nghut ri.

⁴ Haû chyúmding lé hpóng mù, ahkaû má wú râ gingdán é byù rayuq hkâlháng a nyi é yanmai, ngò gyai yhang ngau pyâm é nghut lhê.

⁵ Haû hkûn, haû suwún wuî mâ é rayuq, ngo lé taí é gi, "Hkâ-ngaû! Wú aq, haû Yudaq byuhú mâ é Hkanghkyi nghu é, haû Dawiq é Amyit nghut Sû gi, ûng bê nghut luí, haû chyúmding eq haû mâ é dizik nyhit lhum lé wó hpông lhê." gâ ri.

⁶ Hau htâng, haû dui é dusak myî du eq suwún wui é agùng mâ é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haû gi, hkyuî nyhit lhum eq myoqjí nyhit lhum dap ri. Myoqjí haû nyhit lhum gi, myidâm htoq gón má nhang htoq kat é, Garai Gasâng é woi-nyí nyhit woi-nyí nghut ri.

⁷ Haû Sauzo gi, lé mù, hkohkâm-tanghkuq má zung to Su é loqyò mâ é chyúmding lé yu ri.

⁸ Haû chyúmding lé yu é hkûn jáng, haû dui é dusak myî du eq suwún í xe myi yuq gi, Sauzô é hí má ngóm gop akô. Yhangmoq yuq hhangmó gi, tíng eq sân-yúng bâng é kyúdung dang gâ é namngón jung byíng mui tô é hîng góm pé le chung bum akô nghut ri.

⁹ Yhangmoq gi,

"Nàng gi, haû chyúmding lé yù râ eq hau é dizik pé lé hpóng râ gingdán Sû nghut ri.

Haî mù gâ le, Nàng gi, sat hui bê nghut luî, byuhú
 hkanmó mai le, myíng hkanmó mai le,
 byù myù hkanmó mai le, mingdán hkanmó
 mai le, Garai Gasâng é matú,
 Náng é suî èq byù pé lé wui hpyit yû bê nghut
 ri.

¹⁰ Nga-nhûng é Garai Gasang lé dojaú râ matú,
 Nàng gi, yhangmoq lé, mingdán byu pé eq
 hkyangjông pé dut nhâng bê nghut luî,
 yhangmoq gi, myidàm htoq má up kó râ nghut
 lhê."

ga luî, mahkôn sik ralhum hkon akô nghut ri.

¹¹ Haú hkûn, ngò wú kat le, haû hkohkâm-
 tanghkuq lhîngkhyuq má le, dui é dusak pé eq suwún
 wui é lhîngkhyuq má le, nyi tô bum é maumang
 lagyo ajùm ayò mun mun sen sên é htê lé wó gyô
 ri.

¹² Yhangmoq gi,
 "Haû sat hui bê Sauzo gi, hpungwup a-tsam, sutzè,
 hpaqchyî byéng-yá, wum-o, aróng sitang,
 hpungwup shinkang eq hkya-on kungtôn
 hkyô lé, hap yù gíng ri."

ga luî, htê mó èq ton bum akô nghut ri.

¹³ Hau htoq agó, mauhkûng htoq má nyi é,
 myigùng htoq má nyi é, myigùng ô má nyi é, wuim-
 ing má nyi é, hpan to huî é lhunglháng gi,
 "Hkya-on kungtôn hkyô, aróng sitang, hpungwup
 shinkang eq hpungwup a-tsam gi,
 haû hkohkâm-tanghkuq má zung tô é Sû eq Sauzô
 chyáng,
 pyat dedu ahtum abyuq ru joq nyî sháng gaq
 ô!"

ga luî, ton nyi bùm kô é lé, ngò wó gyô ri.

¹⁴ Haû dui é dusak myî du gi, "Amen" ga taí jang, haû suwún wuî gi, ngóm gop luí noqkuq akô nghut ri.

6

Dizik Nyhit Lhum É Hkyô

¹ Haû Sauzo gi, dizik nyhit lhum mâ é sâng-hî lhum lé hpông kat é hkûn, ngò myang é nghut lhê. Hau htâng, haû dui é dusak myî du mâ é radu gi, maugum su gâ é htê mó èq, "Lé aq." gâ é lé, ngò wó gyô ri.

² Ngò wú kat é hkûn, ngá é myoq hí má myang hpyû radu nyi tô é lé myang ri! Haú má jî to sù gi, lai rahpu chung tô é htoq agó, yhang lé, janmaú ralhum tsûng to byî luí, ûng budang wó râ matú ûng sù rayuq dông htoq ló ri.

³ Haû Sauzo gi, í lhum nghû râ dizik lé hpông kat é hkûn, haû í du nghû râ dui é dusak gi, "Lé aq." ga taí é lé, ngò wó gyô ri.

⁴ Hau htâng, myang nè radu htoq lo ri; haú má jî tô é sù gi, myidàm htoq mâ é ngingón simsaq hkyô lé wup yù râ eq, byù yhangchang rayuq eq rayuq sat lhum nhâng râ a-tsam byî é hui sù nghut luí, yhang lé shâm mó rahkyam le byî to bê nghut ri.

⁵ Haû Sauzo gi, sùm lhum nghû râ dizik lé hpông kat é hkûn, haû sùm du nghû râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri.

⁶ Haú hkûn, "Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut

lhê; haû tsanlun xû eq tsibiyiq wing lé kúm gi, hkâlhoq hten kó." gâ é htê, haû dui é dusak myî du hkaû mai htoq ló é su gâ é lé, ngò wó gyô ri.

⁷ Haû Sauzo gi, myî lhum nghû râ dizik lé hpông kat é hkûn, haû myî du nghû râ dui é dusak gi, "Lé aq." ga taî é lé, ngò wó gyô ri.

⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é myîng gi, Shî hkyô gâ ri; Moming le, yhâng é htâng má châng tô ri; yhangnhik gi, sham eq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsîng hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri.

¹⁰ Yhangmoq gi, "Chyoiyúng é eq tengmán é, ahko ahkáng lhungháng wó é Yhumsîng ê, myidàm htoq má nyi é byu pé lé, ngamoq é sui manglat dam a byî é eq tará a jéyáng é za, hkâ-myháng jé shoq nyi nyi râ lhú?" ga, htê mó èq garu bum akô.

¹¹ Haú hkûn, yhangmoq yuq hkangmó gi, bu hpyû hîng radung dung hut é hui luî, yhangmoq su sat hui râ bang, yhangmoq é byinzùm dui-nhâng zoshâng wuî nghut é gumang wuî sat huî ngap é hkûn jé shoq, razup zim za nyi shi keq ga taî é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún

lo ri; haû bùi gi, saumaú noq èq woq é pán su noq byuq ri; haû lhamó lhum gón gi, sui su ne byuq ri;

¹³ maihpáng gâm lé, lai mó èq lo mut nhûn kat é hkûn, a myhíng shî é maihpáng-shi yoq gyó é su, mauhkûng mâ é kyî pé gi, myidàm htoq má byit gyó lo bum ri.

¹⁴ Haû mauhkûng gi, laiká lé dîng lhûm é su htot pyâm é hui lui, bùm hkang bùm mó eq zinlóng lhumjup pé gi, yhâng é jowò mai huî pyâm é huî ri.

¹⁵ Haú hkûn, haû myidàm htoq mâ é hkohkam pé, uphkâng bang, gyezaû pé, sut wó bang, wum-o a-tsam bò bang, jun pé eq luthkyô wó é lhunglhang bang gi, bùm dong pé eq bùm pé mâ é luqgok gyoro pé má haq tô bùm uchyang,

¹⁶ haû bùm pé eq luqgok pé lé, "Ngamoq é gùng htoq má gyó ke kó laq! Haû hkohkâm-tanghkuq má zung to Su é myoq hí mai le, haû Sauzô é nhikmo-yô é hkyô mai le, ngamoq lé haq pyám kó laq.

¹⁷ Hkâsu mù gâ le, haû Yhangnhik nhikmo-yô é buinyì mó gi, jé bê nghut ri; ó yuq wá wó jân yap nyì râ lú?" ga garû taî bum akô nghut ri.

7

144,000 Yuq Masat Lhô Tap Hui Kô É Hkyô

¹ Hau htâng má, maumang lagyo myi yuq gi, maumyî myi chyûn má yap to mù, myigùng htoq má le, wuì ming htoq má le, sikgâm pé má le, lai a hik sháng gaq ga, myi shut mâ é lai lé zuî zing to kô é lé, ngò myang ri.

² Haú hkûn, haú dui nyi é Garai Gasâng é masat lhô chung é maumang lagyo gotû rayuq gi, buih-toq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé,

³ "Nga-nhông é Garai Gasâng dui-nhông zoshâng wui é ngelang má, ngamoq mai masat lhô a tap byi byi gi, haú myigùng, wui ming eq sikhâm pé lé hkâlhoq hten shi kó." ga htê mó èq wut tai kat ri.

⁴ Haú hkûn, masat lhô tap huí é bang byù hkâm-yhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

⁵ Masat lhô tap huí yu é,
Yudaq up mâ é bang gi, 12,000 yuq,
Rubin up mâ é bang gi, 12,000 yuq,
Gat up mâ é bang gi, 12,000 yuq,

⁶ Ashe up mâ é bang gi, 12,000 yuq,
Nahtali up mâ é bang gi, 12,000 yuq,
Manase up mâ é bang gi, 12,000 yuq,

⁷ Simeon up mâ é bang gi, 12,000 yuq,
Lewiq up mâ é bang gi, 12,000 yuq,
Yishahka up mâ é bang gi, 12,000 yuq,

⁸ Zebulun up mâ é bang gi, 12,000 yuq,
Yosep up mâ é bang gi, 12,000 yuq,
Ben-yamyin up mâ é bang gi, 12,000 yuq,
nghut bum akô.

Bu Hpyû Hing Wut Bâng É Hkyô

⁹ Hau htâng, ngò wú kat é hkûn, mingdán hkangmó mai le, byuhú hkangmó mai le, byù myû hkangmó mai le, myíng chângjup mai le, lé é bang, ó yuq lháng a ung nghap é byù moq mó gi, haú hkohkâm-tanghkuq é hí má le, Sauzô é hí má le, yap

nyi bùm kô é lé myang ri; yhangmoq gi, bu hpyû hîng wut luî, yhangmoq é loq má byùm-haq chung tô bùm kômù,

10 "Hkyi yù hkyô gi, haû hkohkâm-tanghkuq má zung tô é nga-nhûng é Garai Gasang eq Sauzo chyáng mâ é nghut ri ô!"
ga luî, htê mó èq garû bum akô nghut ri.

11 Haû maumang lagyo lhunglhâng bang gi, haû hkohkâm-tanghkuq é lhînghkyuq má le, suwún wuî eq dui é dusak myî du é lhînghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

12 "Amen! Hkya-on kungton hkyô eq hpungwup shing kang,
hpaqchyî byéng-yá eq jeju bun hkyô,
aróng, hpungwup a-tsam eq wum-o gi,
nga-nhûng é Garai Gasâng chyáng pyat dedu ah-
tum abyuq ru joq nyî sháng gaq ô!

Amen!"
ga taî bum akô.

13 Haû hkûn, suwún wuî mâ é rayuq gi, "Shî bu hpyû hîng wut é bang gi, ô pé lhú? Yhangmoq gi, hkâmái lé é bang nghut akô lhú?" ga ngo lé myî ri.

14 Ngò gi, "Suwún hpó ê, nàng sê lhê." nghû tú taî jáng, yhang gi, "Shí bang gi, haû wuîhke jamjau mó mai wó lut htoq lô luî, yhangmoq é bu hîng lé, haû Sauzô é sui má chí hpyû yù bê bang nghut akô.

15 Haû mù, yhangmoq gi, Garai Gasâng é hkohkâm-tanghkuq hí má nyì mù, Yhâng é noqkuq yhûm má, nyí, myín Yhang lé dojaú nyî kô é nghut lhê; haû hkohkâm-tanghkuq má zùng Sû gi, Yhâng

é jonghpang lé, yhangmoq é ahtoq má nghop byi râ* nghut lhê.

¹⁶ Yhangmoq gi, hkâ-nhám le, zòmut wuìshit hui râ a nghut lo; buì lhap é le, hkyíng hkyíng nyé é le, yhangmoq lé wó záng râ a nghut.

¹⁷ Hkâsu mù gâ le, haù hkohkâm-tanghkuq agùng mâ é Sauzo gi, yhangmoq é sau-rém sù dut râ nghut luì, Yhang gi, yhangmoq lé, asak wuibúm jé shoq shuí ê râ nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga taì ri.

8

Nyhit Lhum Nghû Râ Dizik Eq Namngón Jung Nyhê É Hîng Góm

¹ Haù Sauzo gi, nyhit lhum nghû râ dizik lé hpông kat é hkùn, mauhkûng htoq má hkyíng hkum rawuí kô zím byuq ri.

² Haù hkùn, Garai Gasâng é hí má yap tô é mau-mang lagyo nyhit yuq lé, ngò myang ri; yhangmoq lé, tut nyhit lhum byì tô ri.

³ Namngón jung nyhê é hîng góm chung é mau-mang lagyo gotú rayuq gi, haù hkungga gyap yàm má lé yap tô ri. Haù hkohkâm-tanghkuq hí mâ é hîng hkungga gyap má, sân-yúng bang banshoq é kyûdung dang eq rahá nhông byi râ matú, namngón jung gyai myo shoq, yang lé byì tô ri.

⁴ Haù namngón júng é myihkau gi, sân-yúng bâng é kyûdung danghtê eq rahá, maumang lagyo haù

* **7:15** *Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyì mù, yhangmoq lé upzúng nyì râ gâ é nghut lhê.*

yuq é loq mai Garai Gasâng chyáng hkyang rot ló bê nghut ri.

⁵ Hau htâng, maumang lagyo haú yuq gi, góm lé yù mù, hkungga gyap mâ é myi lhoq pyíng yù luí, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut râ hen akô nghut ri.

⁷ Sâng-hî yuq nghû râ maumang lagyo gi, yhâng é tut lé mut kat ri; haú hkûn, sui nyó é likwò eq myi htoq lô mù, haú lé myidàm htoq má lhoq hkyô kat jáng, maumyî sum tú mâ é ratú eq sikhâm sum tú mâ é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghû râ maumang lagyo gi, yhâng é tut lé mut kat ri; haú hkûn, myi dap tô é bùm mó su é lé, wuìshuq lung-aû má dú hkyô kat ri. Wuìshuq lung-aû sum tú mâ é ratú gi, sui dut byuq bê nghut ri;

⁹ wuìshuq lung-aû mâ é dui jung sum tú mâ é ratú gi, shi byuq luí, wuì-sanghpo pé sum tú mâ é ratú gi, htên byuq bê nghut ri.

¹⁰ Sum yuq nghû râ maumang lagyo gi, yhâng é tut lé mut kat ri; haú hkûn, myihu dùm su duq é kyî mó racham gi, mauhkûng mai byit gyó lô mù, wuilàng sum tú mâ é ratú eq wuìbúm pê htoq má lo gyó záng ri.

¹¹ Kyî hau é myìng gi, Kyî Kyî Hko gâ é nghut ri. Wuilàng sum tú mâ é ratú hkô byuq luí, wuì haú

hkô byuq é yanmai byù myo myo shi byuq bekô nghut ri.

¹² Myi yuq nghû râ maumang lagyo gi, yhâng é tut lé mut kat ri; haú hkûn, buì sum tú ratú, lhamó sum tú ratú, kyî sum tú ratú gi, hten luî, haú pê é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³ Ngò wú nyi le, zunbung radu gi, maulat má dâng wún mù, "Gotû maumang lagyo sum yuq èq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luî, htê mó èq garû taí ri.

9

¹ Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham lé, ngò myang ri. Haú nik dik htûm é Lasang-dông é zoqshi gi, kyî haú lé byi tô ri.

² Kyî haú gi, nik dik htûm é Lasang-dong lé hpông kat é hkûn, myi bunghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dong haú mâ é myihkau dum é yanmai, buì eq maulat gi, mauchut byuq bê nghut ri.

³ Myihkau dùm haú mai dinggám pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byi to bê nghut ri.

⁴ Myidàm htoq mâ é wàhu pé lé le, mhan-haq hpoqnoq pé lé le, siggâm pé lé le a lhoq htên é za, yhumsing é ngelang má Garai Gasâng é masat lô

a dap é byu pé lé baú zing-ri râ matú, yhangmoq lé tái tô ri.

⁵ Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shî-nò jamjau gi, gogok eq pat hkûn no hpû é su yhang nghut ri.

⁶ Haú buinyì pé má, byu pé gi, shî hkyô hô kôlhang, myàng kó râ a nghut; shî nau dik kôlhang, haú shî hkyô gi, yhangmoq chyáng mai hfang byuq râ nghut lhê.

⁷ Dinggám haú pé gi, majan zan râ matú bui tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri.

⁸ Yhangmoq é xâm gi, myiwe wui é xâm su dut luî, yhangmoq é zuì gi, hkanghkyi zuì su dut ri.

⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jûm eq myanglhêng pé mying hûm é htê su gâ ri.

¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri.

¹¹ Yhangmoq é hkohkâm gi, nik dik htûm é Lasang-dong mâ é maumang nghut ri; haú é mying gi, Hebre mying dong Abadon ga, Grik mying dông Apolion* gâ ri.

¹² Sâng-hî lhum dingnyé gi, lai ló byuq bê nghut ri; nghut kôlhang, dingnyé í lhum jé lô shirâ nghut

* **9:11** *Apolion* gâ é lichyúm gi, lhoq hten lhoq hpyoq sù gâ é nghut ri.

lhê.

¹³ Haû hkyuq yuq nghû râ maumang lagyo gi, yhâng é tut mut kat ri. Haú hkûn, Garai Gasâng é hí má joq é hîng hkungga gyap é hkyuî myî lhum mai htê htoq lo é gi,

¹⁴ "Uhprat wuî mó lâng má tuî lhûng tô é mau-mang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taî é lé, ngò wó gyô ri.

¹⁵ Haú hkûn, xângzo byù sum tú mâ é ratú lé sat pyám râ matú, ahkyíng, buinyî, lhôhkyap, zanwut lé, rì rì hen to bê nghut é haû maumang myi yuq lé nhang kat bê nghut ri.

¹⁶ Myang ji jî é gyê jum gi, byù du sen í hkyîng bo é hkyó lé, ngò wó gyô ri.

¹⁷ Ngò, shing-rán myang é má, myang jûm eq haú pé má ji bâng é wànggô-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyî pê é ulhum su dut luî, yhangmoq é nhut mai, myi, myihkau eq hang pé htoq lo ri.

¹⁸ Haû yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri.

¹⁹ Myang haú jum é sho-myi gi, lhangmuî su dut luî, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haû sùm jung mai wó lut luî, myit gyó tô é xângzo byu pé gi, yhangmoq é loq pê èq zui saî é muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng,

ngùn, gyi, luqgok, sik pê é alhô lé le, noqkuq é hkyô lé a tô pyám shi kó nghut ri.

²¹ Hau htoq agó, yhangmoq gi, byù sat é mù mai le, myoqheq hpaqchyî mù mai le, ashop é dông gungsho zùm yap é hkyô mai le, hkaû é mai le, myit a lêng shi kó nghut ri.

10

Maumang Eq Laiká Dîng É Hkyô

¹ Hau htâng, ngò gi, wum-o bo é maumang lagyo gotû rayuq, mauhkûng mai gyó lé lo é lé myang é nghut lhê. Yhang lé gi, mhut èq htup yup to luî, yhâng é u htoq má woqgan síng-yang gyân tô ri; yhâng é myoqdong gi, buì su dut luî, yhâng é hkyî gi, myi zîng su dut ri.

² Yhâng é loq má gi, hpông tô é laiká ding zo ralhum chung tô ri; yhâng é loqyo hkyî gi, wuìshuq lung-aû má nang, yhâng é loqpaî hkyî gi, myigùng htoq má nâng to luî,

³ hkanghkyi mying é htê su ga, htê mó èq garû kat ri. Yhang garu kat jáng, maugum htê nyhit lhum tû gûm kat ri.

⁴ Haû maugum htê nyhit lhum tû gûm kat é hkûn, ngò ká râ da jáng, "Haû maugum htê nyhit lhum tû gûm é hkyô lé zaú pyám aq; haú pé lé hkákâ to." ga, mauhkûng mai danghtê htoq lo é lé ngò wó gyô kat ri.

⁵ Haú hkûn, wuìshuq lung-aû eq myigùng htoq má nâng yap tô é lé, ngò myang é maumang lagyo haû gi, yhâng é loqyo loq lé mauhkûng shut tu toq kat ri.

⁶ Haû mù, yhang gi, mauhkûng eq haú má nyi é lhungháng lé le, myidàm htoq eq haú má nyi é lhungháng lé le, wuìshuq lung-aû eq haú má nyi é lhungháng lé le, hpan tô é, pyat dedu ahtum abyuq dui nyì Su é myìng lé lang luì, dakam é gi, "Ahkyíng ratsuí le, lhoq myáng nyì lo râ a nghut!"

⁷ Nghut kôhang, Garai Gasang mai Yhâng é dui-nhâng zoshâng wuì nghut é myiqhtoì pé lé taí to bê é danglù eq rajung za, Yhâng é zaú tô é hkyô gi, nyhit yuq nghû râ maumang lagyô èq yhâng é tut lé mut myhíng é buinyì pé má, shit râ nghut lhê." gâ ri.

⁸ Hau htoq agó, ngò wó gyô wú bê mauhkûng má é htê, ngo lé dum taí é gi, "Haû wuìshuq lung-aû eq myidàm htoq má nâng yap tô é maumang lagyô loq má hpông tô é laiká ding lé, ê yù aq." gâ ri.

⁹ Haû mù, ngò gi, ê luì, laiká ding zo haû, ngo lé byi râ matú maumang lagyo haû lé ê dung le, yhang gi, "Shí lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-ì su yhang chui râ nghut lhê." gâ ri.

¹⁰ Haû mù, ngò gi, laiká ding zo haû lé, maumang lagyô é loq mai yù mù, zô é nghut lhê; haú hkûn, ngá é nhut má gi, byo-ì su yhang chuì nghâm ri; nghut kôle, bàn zô kat é hkûn, ngá é wam hkaû má hkô bê nghut ri.

¹¹ Haú hkûn, "Nàng gi, byù myú myo myo eq séng luì le, mingdán myo myo eq séng luì le, myíng ahú hú eq séng luì le, hkohkam pé myo myo eq séng luì le, myiqhtoì dum htoi ra râ nghut lhê." ga, ngo lé taí kyô ri.

11

Saksé Í Yuq É Hkyô

¹ Ké râ jung dumbáng su dut é jàm-yang rahkat ngo lé byi luî, ngo lé taî é gi, "Ê mù, haû Garai Gasâng é noqkuq yhûm lé le, hkungga gyap lé le, kê wú luî, haû má noqkuq é bang lé nghap wú aq.

² Nghut kôlhang, shinggan mâ é wâng lé gi, a kê é za lhaî pyâm to aq; hkâsu mù gê le, haû gi, tûngbaù pé lé byî to bê nghut lhê. Yhangmoq gi, haû chyoiyúng myuq lé, lhamó myixe í hkyap tup chôm nang kó râ nghut lhê.

³ Hau htoq agó, ngò gi, ngá é saksé í yuq lé a-tsam byi râ nghut luî, yhangnhik gi, ji mebu wut* mù, buinyì 1260 nyí tup myiqhtoi htoi kó râ nghut lhê." gâ ri.

⁴ Yhangnhik gi, haû myidàm Yhumsing é hí má yuq tô é tsanlun gàm í gâm eq myibung tsungjang í lhum nghut ri.

⁵ Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám râ nghut lhê. Yhangnhik lé kâm zing-ri é sù gi, haû su kut sat pyâm é hui zo râ nghut lhê.

⁶ Yhangnhik gi, yhangnhik myiqhtoi htoî nyi é buinyì pé má mau a wò râ matú, mauhkûng lé myhî pyám râ a-tsam wó akô; hau htoq agó, wui pé lé sui dut nhâng râ eq, nau é hkûn, wúm ajung jûng eq myidàm htoq lé ihkyup hkyó byi râ a-tsam le, wó akô nghut ri.

* **11:3** Ji mebu wut gâ é gi, iyon yôn é lé gâ lhê.

⁷ Yhangnhik gi, saksé ban hkâm é hkûn, haû nik dik htûm é Lasang-dong mai htoq lo é tân jung dusak gi, yhangnhik lé htim mù, ûng luí, sat pyám râ nghut lhê.

⁸ Yhangnhik é mâng lé gi, danglhîng dông Sodom eq Egutuq gâ é, yhangnhik é Yhumsîng lé le, tapzîng má jén sat pyâm é myuq mó é hkyô gùng má, leq to râ nghut lhê.

⁹ Haú hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám râ matú a gyo kô é za, sum nyí èq rahkyuí tup chôm wú nyí kó râ nghut lhê.

¹⁰ Myidàm htoq má nyí é bang gi, yhangnhik shi byuq é yanmai gabú nguingón luí, rayuq eq rayuq chyunghuq byí lhûm é dông ngón poí kut kó râ nghut lhê. Hkâsu mù gâ le, myiqhtoi haú nhik gi, myidàm htoq má nyí nyí é bang lé, wuîhke jamjau byí lai bê su nhik nghut akô.

¹¹ Nghut kôlhang, sum nyí èq rahkyuí tup lai é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bûm bekô nghut ri.

¹² Haú hkûn, "Shî má doq lò keq." ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq ló bekô nghut ri.

¹³ Haú u lé yhang, layàng mó nún lô luí, myuq hkaû raxê tú mâ é ratú gi, htên gyop byuq bê nghut ri. Hau htoq agó, byù nyhit hkyîng yuq shi byuq bê nghut luí, myit gyó tô é bang gi, gyai yhang gyuq

nán bûm kômù, mauhkûng mâ é Garai Gasang lé hkyá-on shigyáú bum akô nghut ri.

¹⁴ Í lhum nghû râ dingnyé gi, lai byuq bê nghut ri; sûm lhum nghû râ dingnyé gi, jé rá za nghut bê.

Nyhit Lhum Nghû Râ Tut Mut É Hkyô

¹⁵ Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi,

"Mingkan htoq mâ é mingdán gi, nga-nhûng é Yhumsîng eq Yhâng é Hkrisduq é mingdán dut bê nghut lui,

Yhang gi, pyat dedu ahtum abyuq up nyi râ nghut lhê."

gâ ri.

¹⁶ Haú hkûn, yhumsing é hkohkâm-tanghkuq má zùng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang tái kô é gi,

¹⁷ "Ahkuî pyat, a-nham pyat rû dui nyi é, wum-o a-tsam dik shoq bò Sû Yhumsîng Garai Gasang ê!

Nàng gi, hpungwup a-tsam mó chûng mù, up nyi bê nghut é yanmai, ngamoq, Nàng lé jeju hkyá-on lhê.

¹⁸ Byù myú pé gi, nhikjum yo bûm kôluí, Nàng é nhikmo-yo hkyô gi, jé bê nghut ri.

Shî bê bang lé, tarâ jéyáng râ eq, Nàng é dui-nhâng zoshâng myiqhtoí pé lé le,

Nàng é sân-yúng bang lé le, Nàng é myìng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq
hten bang lé lhoq hten râ, ahkyíng gi, jé bê
nghut ri."

gâ akô.

¹⁹ Haú hkûn, mauhkûng htoq má, Garai Gasâng
é noqkuq yhûm hpông to luí, Yhâng é noqkuq
yhúmhaú má, Yhâng é dangshikaq eq sêng é saksé
sidek lé byu-myang ri. Haú hkûn jáng, lhap hpyat
é, myìng hûm é, maugum gûm é, layàng nún é,
likwò mó gyó é pé dut htoq lo ri.

12

Myiwe Myhí Eq Manjung É Hkyô

¹ Hau htoq agó, mauhkûng má limik kumlhá mó
htoq shit é gi: myiwe myhí rayuq gi, buì lé wut
chûng mù, lhamó má hkyî ke luí, kyî raxe í cham
dap é janmaú lé, yhâng é ulhum má tsûng tô ri.

² Yhang gi, zogûng dut tô é nghut luí, zo hkû râ
matú, zohkû-nò no nyi é yanmai, gyai yhang ngau
garú nyi ri.

³ Hau htâng, mauhkûng má gotû kumlhá dum
htoq shit é gi: gyai kô é manjung nè mó* radu
gi, ulhum nyhit lhum eq hkyuí raxê lhum dap luí,
yhâng é ulhum hkangmó má janmaú tsûng tô ri.

⁴ Yhâng é sho-myi gi, mauhkûng mâ é kyî sum tú
mâ é ratú lé shûm tsîng yù mù, myidàm htoq má
he hpyit hkyô kat ri. Manjung haú gi, zoshâng hku
htoq kat eq wó myui hâng kat shoq ga, haú myiwe
myhí é hí má lánng yap tô ri.

* **12:3** *Manjung nè mó gâ é gi, Tsadán lé taí nau é nghut lhê.*

⁵ Myiwe myhí haû gi, mingdán banshoq lé sham-toq dumbáng eq up râ nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri.

⁶ Myiwe myhí haû gi, yhâng é matú Garai Gasang lajâng to byî é yoso hkaû má hpang wang ê bê nghut ri; haú jowò má, yhang gi, 1260 nyí tup lhom baú é hui râ nghut lâ.

⁷ Mauhkûng htoq má majan htoq bê nghut ri. Mihkaelaq eq yhâng é maumang lagyô pé gi, manjung lé majan ê zan kôluí, haû manjung eq yhâng é maumâng pé le, tau zân akô.

⁸ Nghut kôlhang, yhangmoq gi, a ûng kômù, mauhkûng mâ é yhangmoq nyí jowò lhoq hpyuq pyám bekô nghut ri.

⁹ Haû mingkan gón lé hkyô shuí nghoq é, natzau eq Tsadán ga é, a-nham lhê é lhangmui nghut é manjung mó haû gi, yhâng é maumang pé eq rahá myidàm htoq má dú hkyô pyâm é hui bê nghut ri.

¹⁰ Haú hkûn, mauhkûng htoq má htê mó dông taí é lé, ngò wó gyô é gi,

"Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le,
Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wuì lé,
nyí, myín mara hun nyi é sù gi, dú hkyô pyâm é hui bê nghut ri.

¹¹ Yhangmoq gi, haû Sauzô é suí é yanmai le,

yangmoq saksé hkâm é mungdâng é yan-
mai le,
yang lé ung pyám bekô nghut luî, shi byuq é jé
shoq yhumsing asak lé a ha kó nghut ri.

¹² Haû mù luî, mauhkûng eq haú má nyi é bang ê,
gabú nyî keq!

Nghut kôlhang, myidàm htoq eq wuîshuq lung-aû
gi, dingnyé wó ri;

hkâsu mù gà le, haû natzau gi, yhâng é ahkýing
yàm-yoq tot za ru joq alô nghut é lé sê é
yanmai,

nhikmo-yô é èq, nungnhik chyáng gyó lé lô bê
nghut ri."

gâ ri.

¹³ Haû manjung gi, myidàm htoq má dú hkyô kat
huî é lé myàng luî, haû yuqzo hku é myiwe myhí lé
zing-rî ri.

¹⁴ Myiwe myhí haû gi, lhangmuì chyáng mai wó
lut luî, yang é matú lajâng tô é yoso má wó dang
jé mù, ahkýing ralhûm, ahkýing í lhûm, ahkýing
rawuí hkup† lhóm baú nyi é hui sháng gaq ga, zùn
mó é dùng í lhûm byî é huî ri.

¹⁵ Haú hkûn, haû lhangmuì gi, myiwe myhí haû
lé wó lhoq myhû pyám shoq ga, myiwe myhí é
nunghtáng má, yhâng é nhut mai wuî mó lâng î é
wuî lhoq htoq kat ri.

¹⁶ Nghut kôlhang, manjung nhut mai lhoq htoq
kat é wuî mó lâng haû lé, myígùng gi, yhâng é nhut
há mù myui pyám byî é dông, myiwe myhí haû lé
garúm yu ri.

† 12:14 Ahkýing ralhûm, ahkýing í lhûm, ahkýing rawuí hkup gâ é gi,
"razàn, í zân, lhamó hkyuq hkyap" lé gâ é nghut lhê; haû gi, 1260
nyî nghut ri.

¹⁷ Haû mù, manjung haû gi, myiwe myhí hau é yanmai, gyai yhang nhikmo-yo luí, Garaí Gasâng é jep é tará lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri.

¹⁸ Manjung haû gi, wuìshuq lung-aû yàm má yap tô ri.

13

Tân Jung Dusak Radu Wuìshuq Lung-aû Mai Htoq Lo É Hkyô

¹ Haú hkûn, haû wuìshuq lung-aû mai tân jung dusak radu htoq lo é lé, ngò myàng ri. Dusak haû má, hkyuî raxê lhum eq ulhum nyhit lhum dap to luí, yhâng é hkyuî pé má gi, janmaú raxê lhum tsûng to mù, ulhum hkangmó má gi, Garaí aróng lhoq hpoi é myìng dap tô bum ri.

² Ngò myang é tân jung dusak haû gi, bauze-lo su dut ri; nghut kôlhang, hkyî gi, wàm hkyî su dut luí, nhut gi, hkanghkyî nhut su dut ri. Haû manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haû lé ap byî ri.

³ Tân jung dusak hau é ulhum ralhum gi, shî râ í é dàm dap huí é su dut kôlhang, damhkô haû gi, yâ ge pyám bê nghut luí, mingkan gón gi, mauhong byuq kômù, yhâng htâng châng bùm bekô nghut ri.

⁴ Manjung gi, tân jung dusak lé ahko ahkáng ap byî é yanmai, byu pé gi, manjung haû lé noqkuq é htoq agó, tân jung dusak haû lé le, noqkuq kômù, "Ó yuq wá, tân jung dusak shí du su dut ri lhú? Ó yuq wá, yhang lé wó zan ûng râ lhú?" ga bum akô.

⁵ Gyáng dang tái rã eq Garaî aróng lhoq hpoi dang tái rã nhut gi, tân jung dusak haũ lé byi to bê nghut é htoq agó, lhamó myí xe í hkyap tup, yhâng é ahko ahkáng lé chũng rã ahkáng wó bê nghut ri.

⁶ Yhang gi, yhâng nhut hpóng mù, Garaî Gasâng aróng lé lhoq hpoi dang tái é htoq agó, Garaî Gasâng é myìng eq nyì jowò lé le, mauhkũng htoq má nyì é bang lé le, lumù gansang é sũ nghut ri.

⁷ Haũ sãn-yúng bang lé majan zãn ung yù rã a-tsam, yhang lé byi bê nghut ri. Hau htoq agó, byuhú hkanmó lé le, byù myũ hkanmó lé le, myíng hkanmó lé le, mingdán hkanmó lé le, up rã ahkáng, yhang lé byi bê nghut ri.

⁸ Haũ sat hui bê Sauzo eq sêng é asak jihpán laiká buk má, mau htoq xâng hkun mai, myìng a kã lhom é, myidàm htoq má nyì é lhunghâng bang gi, haũ tân jung dusak lé noqkuq kó rã nghut lhê.

⁹ Gyo rã nohkyap đap sũ gi, gyô yù sháng gaq.

¹⁰ Shúm zung é hui rã sũ gi, shúm zung é hui rã za nghut lhê.

Sham èq sat é hui rã sũ gi, sham èq sat é hui rã za nghut lhê.*

Haũ mù, sãn-yúng bang gi, hkam jãn é hkyô eq lhumzui hkyô bò kó rã nghut lhê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotũ radu† myigùng mai htoq lo é lé myang ri. Yhang gi, sauzô

* **13:10** Chyúmding ra-am má gi, *Byù rayuq yuq lé, shúm kut é sũ gi, shúm zung é hui rã nghut lhê. Sham èq byù sat é sũ gi, sham èq sat é hui rã nghut lhê, ga bo tô ri.* † **13:11** *Tân jung dusak gotũ radu gã é shĩ gi, myiqhtoi pyoq lé gã nau é nghut lhê.*

é hkyuî su dut é hkyuî í lhum yuq ri; nghut kôlhang, yhang gi, manjung su ga dang nyo ri.

¹² Yhang gi, tân jung dusak hí lhê dû é ahko ahkáng lhunglhang lé, haú du é hí má chûng mù, shî râ î é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri.

¹³ Hau htoq agó, yhang gi, byu pè é myoq hí má, mauhkûng mai myigùng shut myi lé lhang wó lhoq hkyô é, limik kumhá mó kut shit ri.

¹⁴ Yhang gi, tân jung dusak hí lhê dû é hí má, kumhá haú pé kut râ ahkáng wó é yanmai, myidàm htoq má nyi é bang lé mhoq hpyoq yû luî, haú shâm damhkô dap kôlhang, dui nyi é tân jung dusak haú lé, hkunggá é dông, yhangmoq lé, yhâng é alhô saí nhang ri.

¹⁵ Yhang gi, haú tân jung dusak hí lhê dû é alhô lé, soq wó mut kat byî é a-tsam lé wó yû sù nghut ri; haú mù, alhô haú gi, dang wó taí luî, yhang lé a noqkuq é bang lé, sat hui nhang ri.

¹⁶ Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkanmó lé, yhumsing é loqyo loq má nghut nghut, ngelang má nghut nghut, masat lhô zik tap yû nhang ri.

¹⁷ Haú hkûn, haú tân jung dusak é myìng, a nghut jáng, yhâng mying é masat námbat dap sù mai lai luî, úng é, wui é hkyô, ó yuq le wó kut râ a nghut.

¹⁸ Hpaqchyî byéng-yá gi, shî má bo râ ri. Hpaqchyî bò sù gi, haú tân jung dusak é námbat lé sôn wú sháng gaq; hkâsu mù gâ le, haú gi, byù rayuq é námbat nghut lhê. Yhâng é námbat gi, 666

nghut ri.

14

Sauzo Eq 144,000 Yuq É Hkyô

¹ Hau htâng, ngò wú kat le, haû Sauzo gi, Zi-un bùm má yap tô é lé myang ri; Yhâng mying eq Yhâng Wâ é mying lé, yhumsing é ngelang má kâ tap tô é byù 144,000 yuq le, Yhang eq rahá yap tô bùm ri.

² Haú hkûn, ngò gi, wuì pé mying hûm é htê eq maugum mó gûm é htê su gâ é htê, mauhkûng mai htoq lo é lé wó gyô ri. Ngò wó gyô é htê haû gi, tíng bat bang, yhangmoq é tíng lé bat myhîng é htê su gâ ri.

³ Yhangmoq gi, haû hkohkâm-tanghkuq é hí má le, dui é dusak myî du eq suwún wui pé hí má le, mahkôn sik lé hkon akô nghut ri. Haû myidâm htoq mai hkyi yù huí é byù 144,000 yuq mai lai luî, ó yuq le, mahkôn haû lé a wó mhoq sê yù kó nghut ri.

⁴ Haú bang gi, myiwe wuì eq gungsho a zum é bang nghut luî, yhangmoq gi, zorâm jet pé nghut bum akô. Yhangmoq gi, haû Sauzo hká shut é le hká shut châng é bang nghut akô. Yhangmoq gi, byu pé chyáng mai wui yu é hui luî, sâng-hi myhîng é ashi lé su, haû Garai Gasang eq Sauzo lé ap byí é hui akô nghut ri.

⁵ Yhangmoq é nhut má, mhaû é hkyô haî le a tái kó; yhangmoq chyáng mara hûn râ hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotû rayuq gi, maulat má dâng wún é lé ngò myang ri; yhang gi, haû mingkan htoq má nyi é, mingdán hkanmó mâ é bang, byuhú hkanmó mâ é bang, myíng hkanmó mâ é bang, byù myû hkanmó mâ é bang lé, hko kyo râ ahtum abyuq é gabú danglù wó ri.

⁷ Yhang gi, "Garai Gasang, tarâ jéyáng râ ahkýng jé bê nghut é yanmai, Yhang lé gyuq hkungga luî, Yhâng é hpungwup a-tsam lé shígyaú keq. Haû mauhkûng eq myigùng, wuìshuq lung-aû eq wuìbúm pé hpan tô é Sû lé, noqkuq keq." ga luî, htê mó èq tái ri.

⁸ Í yuq nghû râ maumang lagyo gi, htâng má châng lé mù, "Haû mingdán pé* lhunglhang lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga tái ri.

⁹ Sum yuq nghû râ maumang lagyo gi, yhangn-hik é htâng má châng lé mù, "Haû tân jung dusak eq yhâng é alhô lé, noqkuq luî, yhumsing é ngelang má nghut nghut, loq má nghut nghut, yhâng é masat lô lé tap yu é sù, ó yuq nghut kôle,

¹⁰ Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haû chyoiyúng maumang lagyo pé hí má le, Sauzô é hí má le, yhang gi, duq nyi é myi eq hang èq zing-rî é hui zo râ nghut lhê.

¹¹ Yhangmoq zing-ri huî é myihkau gi, pyat dedu ahtum abyuq htoq nyi râ nghut lhê. Haû tân jung

* **14:8** *Mingdán pé gâ é gi, a lumjîng bang lé gâ é nghut lhê.*

dusak eq yhâng é alhô lé, noqkuq é bang eq yhâng mying é masat lhô tap yû sù é matú gi, nyí, myín, no rá ahkyíng wó rá a nghut." ga luí, htê mó èq tái ri.

¹² Garai Gasâng é jep é tarâ cháng luí, Yesuq lé lhumzuí nyi é bang nghut é, sân-yúng bang gi, hkam shirang é hkyô bò rá lhê.

¹³ Hau htâng, "Ahkuí mai gi, haú Yhumsíng má shí é sù, hkungsô wó nyi ri nghû kê to aq." gâ é htê, mauhkûng mai htoq lo é lé, ngò wó gyô ri.

Haú hkûn, haú Woi-nyí gi, "Nghut rô, yhangmoq kut é muzó é akyû gi, yhangmoq htâng cháng rá nghut é yanmai, yhangmoq gi, yhumsíng zuí ngu é muzó mai myang hkying bekô rá nghut lhê." ga tái ri.

Myidàm Htoq Mâ É Kyôshi Shû É Hkyô

¹⁴ Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haú má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsûng to luí, Yhâng é loq má gi, htoq é zaiyik ralhum chung tô ri.

¹⁵ Haú hkûn, gotû maumang lagyo gi, noqkuq yhûm mai htoq lô mù, "Haú myidàm htoq mâ é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq." ga, haú mhut htoq má zung tô é Sù lé, htê mó èq tái garû kat ri.

¹⁶ Haú mù, mhut htoq má zung tô é Sù gi, Yhâng é zaiyik lé, myigùng htoq má dú hkyô kat luí, myidàm htoq mâ é kyôshi lé, ban shû yù bê nghut ri.

¹⁷ Maumang lagyo gotû rayuq gi, mauhkûng htoq mâ é noqkuq yhûm mai htoq lo ri; haú yuq le, htoq é zaiyik ralhum chung tô ri.

¹⁸ Haû, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mâ é tsibiyiq shi gi, myhíng bê nghut é yanmai, náng é htoq é zaiyik yù mù, tsibiyiq shipaû haú pé lé, yâm tsíng yù aq." ga, htê mó eq taí garû kat ri.

¹⁹ Maumang lagyo haû gi, yhâng é zaiyik lé, myidàm htoq má dú hkyô kat mù, haú mâ é tsibiyiq shi pé lé yâm tsíng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri.

²⁰ Myuq shinggan mâ é tsibiyiq wing pyik jang haú má, tsibiyiq shi haú pé lé nâng nyhoq luí, tsibiyiq wing pyik jang haú mai suí yui htoq lo é gi, myang lunghtúng myháng jé shoq jé lô mù, 180 déng[†] kô we shoq yui ló bê nghut ri.

15

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

¹ Ngò gi, mauhkûng má gotû limik kumhá joq é lé, dum byu-myang ri; haû gi, wúm nyhit lhum chung é maumang lagyo nyhit yuq nghut ri; wúm haú pé gi, ló htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haú gû mai bàn râ nghut lhê.

² Hau htoq agó, myi eq nyhò tô é myoqjàm wuì-nhông su dut é lé le, ngò myang ri; haû tân jung

[†] 14:20 180 déng gi, Grik pê é stadia 1600 kô bo ri.

dusak eq yhâng é alhô lé le, yhâng mying é námbat lé le, wó ung pyám bê bang gi, wuì-nhông yàm haú má yap tô bum akô; yhangmoq gi, Garai Gasang byî é títg pé lé chung to kôluí,

³ Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi, "Wum-o a-tsam dik shoq bò Sû Yhumsîng Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

⁴ Yhumsîng ê, Nàng lé a gyuq a hkungga râ eq Náng myíng lé a lhoq gyaú râ gi, ó yuq wá nyì râ lhú?

Hkâsu mù gâ le, Nàng za chyoiyúng é Sû nghut ri. Nàng kut é dingmán hkyô gi, tûn shit bê nghut é yanmai,

byù myû lhunglhang gi, Náng hí má lé noqkuq kó râ nghut lhê."

gâ akô nghut ri.

⁵ Hau htâng, ngò wú kat le, mauhkûng má, saksé zúm joq é noqkuq yhûm bóng tô é lé, myang ri.

⁶ Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbó é nú nhám mebu wut luí, yhangmoq é wànggàng má hîng hpyihit baíyup tô akô nghut ri.

⁷ Haú hkûn, haú dui é dusak myî du mâ é radu gi, pyat dedu ahtum abyuq dui nyí é Garai Gasâng é nhikmo-yo hkyô byíng tô é hîng góm nyhit lhum, haú maumang lagyo nyhit yuq lé byî ri.

⁸ Garai Gasâng é hpungwup shingkang eq hpungwup a-tsâm é yanmai, haú noqkuq yhûm gi,

myihkau byíng zan to bê nghut luí, haú maumang lagyo nyhit yuq é wúm nyhit jung za a bàn bàn gi, noqkuq yhúm haú má ó yuq le a wó wâng kó nghut ri.

16

Garai Gasâng É Nhkmo-yo Hkyô Bo É Góm Nyhit Lhum

¹ Hau htâng, maumang lagyo nyhit yuq lé, "Htoq ê mù, haú Garai Gasâng é nhkmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhúm mai htê mó èq taí é lé, ngò wó gyô ri.

² Haú hkûn, sâng-hí yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haú tân jung dusak é masat lhô dap é eq yhâng é alhô lé noqkuq é bâng chyáng, achayut é eq hkê-nho dik é, yapjeq ana dap tô bùm bê nghut ri.

³ Í yuq nghû râ maumang lagyo gi, yhâng é góm lé, wuìshuq lung-aú má hut hkyô kat ri; haú gi, shí bê byù rayuq é sui su dut byuq é htoq agó, haú má lúng é dui jung lhunglhang gi, shi byuq bê nghut ri.

⁴ Sum yuq nghû râ maumang lagyo gi, yhâng é góm lé, wuìlàng pé eq wuìbúm pé má hut hkyô kat jáng, haú pé gi, sui dut byuq bê nghut ri.

⁵ Haú hkûn, haú wuì lé upzúng é maumang lagyo taí é lé, ngò wó gyô é gi,
 "A-nham pyat le, ahkui pyat le, rú nyi nyi é Chy-oiyúng Sû ê,
 Nàng haú su kut jéyáng bê nghut é yanmai, Nàng gi, tengmán Sû nghut ri;

⁶ hkâsu mù gâ le, yhangmoq gi, Náng é sâh-yúng
bang eq myiqhtoîpê é sui lé, lhoq htoq pyám
bekô nghut lui,

Nàng gi, yhangmoq lé sui shuq nhang é nghut
ri; haû gi, yhangmoq hui zo gíng é hkyô
nghut ri."

gâ ri.

⁷ Haû hkûn, haû hkungga gyap mai,

"Nghut rô! Wum-o a-tsam dik shoq bò Sû
Yhumsing Garai Gasang ê, Nàng jéyáng é
hkyô pé gi, tengmán é eq dingmán é nghut
ri."

ga le, taî kat é htê lé, ngò dum wó gyô ri.

⁸ Myi yuq nghû râ maumang lagyo gi, yhang é
góm lé, bui é ahtoq má hut hkyô kat é hkûn, bui gi,
byu pé lé myî èq nyhê kyuq râ ahkáng wó bê nghut
ri.

⁹ Haû mù, yhangmoq gi, nyé dik é èq nyhê kyuq
é hui zo lui, wúm shí pé lé up nyi é Garai Gasang
é mying lé nhing akô; haû-í yhang hpuzo kôhang,
yhangmoq gi, myit le a lhing kó, Garai Gasang lé le
a shigyaú kó nghut ri.

¹⁰ Ngo yuq nghû râ maumang lagyo gi, yhang
é góm lé, tân jung dusak é hkohkâm-tanghkuq
htoq má hut hkyô kat jáng, yhang é mingdán gi,
mauchut tuq dut byuq bê nghut ri. Mingbyû wui
gi, yhumsing é shô lé lháng, ngat tân bùm shoq shî-
nò jamjau hui zo kôlui,

¹¹ yhangmoq no hpû é eq jeq é ana dap é yanmai,
mauhkûng mâ é Garai Gasang lé nhing akô; haû-
í yhang hpuzo kôhang, yhangmoq gi, yhangmoq
kut é hkyô mai myit a lhing shi kó nghut ri.

12 Hkyuq yuq nghû râ maumang lagyo gi, yhâng é góm lé, Uhprat wuì mó lãng má hut hkyô kat jáng, wuìlàng haú gi, kân byuq luì, haú buihotoq hkyam mâ é hkohkam pé, lé lô râ hkyô dong bê nghut ri.

13 Haú hkûn, po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoì pyoq pé é nhut mai htoq lô kô é bang nghut akô.

14 Woi-nyí haú pé gi, nat gâng pé é woi-nyí nghut luì, limik kumlhá pé kut shit kômù, haú wum-o a-tsam dik shoq bò Sû Garai Gasâng é buinyì mó má majan zan râ matú, mingkan gón mâ é hkohkam pé lé lhoq tsîng yù râ ga, htoq e lô akô nghut ri.

15 "Wú keq, Ngò gi, hkau sù su jé lé é nghut lhê! Su hí má gungchín a so râ eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luì, gyíng gyíng kut nyí é sù gi, hkungsô wó nyi ri."*

16 Haú mù, nat haú bang gi, hkohkam pé lé, Hebre myíng dông Armagedon gâ é jowò má, rahá ji tsîng tô akô nghut ri.

17 Nyhit yuq nghû râ maumang lagyo gi, yhâng é góm lé, maulat má hut hkyô kat ri; haú hkûn, haú noqkuq yhûm mâ é hkohkâm-tanghkuq mai, "Bàn bê!" gâ é htê mó htoq lo ri.

18 Hau htoq agó, lhap hpyat é, myíng hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyí é hkûn mai, layàng haú su nún é eq haú-í htan é gi, a joq wú shí é nghut lhê.

* 16:15 Dang shí hkun gi, Yesuq taí é dang nghut lhê.

¹⁹ Haû mù, haû myuq mó gi, sùm hkyam byak goq byuq luî, mingdán pé mâ é myuq pé le, gyop byuq bê nghut ri. Garai Gasang gi, Babelon myuq mó lé le myit bun luî, Yhâng é nhikmo-yô é tsibiyiq wing byíng shoq bo é góm lé shuq nhâng bê nghut ri.

²⁰ Zinlóng hkangmó gi, h pang byuq bê nghut luî, bùm pé le byuq byuq bê nghut ri.

²¹ Haú hkûn, myi xê jói kô laî é likwò mó gi, mauhkûng mai byu pé htoq má wo gyó gyûn ri; likwò wúm gi, gyai yhang wuîhke jamjaû é wúm nghut é yanmai, byu pé gi, Garai Gasang lé nhîng bum akô nghut ri.

17

Shiwa Myhí Mó É Hkyô

¹ Haû góm nyhit lhum chung tô é maumang lagyo nyhit yuq mâ é rayuq gi, lé lô mù, "Lé aq, haû wui myo myô pé htoq má zung tô é shiwa myhí mó lé dam byi râ hkyô, ngò, nang lé tân shit bá.

² Myidàm htoq mâ é hkohkam pé gi, yhang eq rahá ashop é dông gungsho zùm yap é hkyô kut shut kôluî, myidàm htoq má nyi é bang gi, yhang kut shut é myiwe yuqgè nyi zô lhum hkyo é tsibiyiq wing lé shuq wut bùm bekô nghut ri." ga luî, ngo lé taî ri.

³ Haû mù, maumang lagyo haû gi, Woi-nyí má, ngo lé yoso shut shuí wang e ló ri. Haû ulhum nyhit lhum eq hkyuî raxê lhum dap luî, taí hpoí é myìng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri.

⁴ Myiwe myhí haû gi, me me dut é eq zam zam ne é mebu wut luí, hîng, lungsêng, palhé pê èq mhôn chung ri; yhâng é loq má gi, yhâng é myiwe yuqgè nyi zô lhum hkyo é agot a-û hkyô eq achag achyut é zè pé byíng tô é hîng góm ralhum chung tô ri.

⁵ NIK DIK É HKYÔ, MYIDÀM HTOQ MÂ É ACHAQ
ACHYUT HKYÔ PÉ EQ SHIWA MYHÍ PÊ É
YHÂNGNU, BABELON MYUQ MÓ.

gâ é myìng gi, yhâng é ngelang má kê tap tô ri.

⁶ Myiwe myhí haû gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haû mù, ngò gi, gyai yhang maú byuq é nghut lhê.

⁷ Haú hkûn, maumang lagyo haû ngo lé taí é gi, "Nàng, haí mù maú lhê lú? Myiwe myhí haû eq, yhang jî tô é, ulhum nyhit lhum eq hkyuí raxê lhum dap é tân jung dusak é zaú tô é hkyô lé, ngò, nàng lé taí kyo râ nghut lhê.

⁸ Nàng myàng é tân jung dusak haû gi, hí hkûn nyi wú bê, ahkuí a nyi lo, nghut kôlhang, nik dik htûm é Lasang-dong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk má myìng a kê tô é, myidàm htoq má nyi é bang gi, tân jung dusak haû lé myàng kô é hkûn, maú byuq bùm kó râ nghut lhê. Hkâsu mù gâ le, haû gi, nyi wú bê, ahkuí a nyi lo, nghut kôlhang, dum lé râ nghut é yanmai nghut ri.

⁹ Hpaqchyí byéng-yá bo é nyan gi, shî má râ ri. Haû ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri.

10 Ngo yuq gi, byit gyó byuq bê; rayuq gi, ahkuí nyi to ashî; myit tô é rayuq gi, a jé lé shî nghut ri; haú yuq jé lé é hkûn, yhang gi, ahkyíng razup zo za wó nyí râ nghut lhê.

11 Hí hkûn nyi wú bê, ahkuí a nyi lo dut é tân jung dusak haú gi, shit yuq nghû râ hkohkâm nghut ri. Yhang gi, haú nyhit yuq eq sêng é yanmai, yhâng é htên byoq hkyô shut e ló râ nghut lhê.

12 Haú nàng myàng é hkyuí raxê lhum gi, mingdán a myang yù shî é hkohkâm raxê yuq nghut ri; nghut kôlhang, yhangmoq gi, haú tân jung dusak eq rahá za, hkyíng hkum rahkum kô hkohkâm ayá lé wó yù kó râ nghut lhê.

13 Yhangmoq gi, myit myoqbyù hkyô ralhum za nghut kômù, yhangmoq é a-tsam eq ahko ahkáng lé, haú tân jung dusak lé byi kó râ nghut lhê.

14 Yhangmoq gi, haú Sauzo lé majan chôm zan kó râ nghut lhê; nghut kôlhang, Sauzo haú gi, yhumsing pê é Yhumsîng eq hkohkam pê é Hkohkâm nghut é yanmai, yhangmoq lé ung pyám râ nghut lhê. Haú Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô." gâ ri.

15 Hau htâng, maumang lagyo haú ngo lé dum taí é gi, "Nàng myang é, shiwa myhí zung tô é wui pé gi, byù myû pé, byù ajùm ayò pé, mingdán pé eq myíng lhumjup nghut ri.

16 Haú nàng myang é tân jung dusak eq hkyuí raxê lhum gi, shiwa myhí haú lé a jú kut kó râ nghut luí, yhâng é sutzè banshoq shang yu pyám byi mù, mebu lháng a dap loshoq achîndum kut to kó râ nghut lhê; hau htoq agó, yhâng é sho lé zo luí,

myî èq nyhê hkyô pyám kó râ nghut lhê.

¹⁷ Hkâsu mù gâ le, Garai Gasang gi, haú bang mai, i-myit rahkat zâ èq, yhumsing é a-tsam, haú tân jung dusak lé byi râ myit, yhangmoq lé kat byi Sû nghut ri. Haú mù, yhangmoq gi, Garai Gasâng é mungdang lhoq dik é hkûn jé shoq, haú su kut kó râ nghut lhê.

¹⁸ Nang myang é myiwe myhí haú gi, myidàm htoq mâ é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

¹ Hau htâng, maumang lagyo gotû rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut luî, haú myidàm htoq lé, yhâng é hpungwup èq duqbó to byi ri.

² Yhang, htê mó o mó èq garû taî kat é gi,
"Babelon myuq mó gi, lêng gyop bê, lêng gyop bê!
Myuq haú gi, nat gâng pê é yhûm eq agè ashop é
nat hkangmó é hkyûng dut byuq é htoq agó,
a sansêng é eq achag achyut é nghoq pé nyi é sùt
dut byuq bê nghut ri.

³ Hkâsu mù gâ le, haú byù myû lhunglháng gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haú myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhâng
 é ladu lai shoq ngón kún é hkyo é yanmai,
 sutzè wó bôm bekò nghut ri."

gâ ri.

⁴ Hau htâng, mauhkûng mai htoq lo é htê gotû lé
 ngò dum wó gyô é gi,
 "Ngá é byu pé é, myuq hau é mara pé má nungmoq
 a bo lòm râ matú le,
 yhâng é wúm pé lé nungmoq a hui zo kó râ matú
 le, haû mai hân hpang htoq lò keq;

⁵ hkâsu mù gâ le, yhâng é mara gi, mauhkûng htung
 shoq bum zang to bê nghut luî,
 Garai Gasang gi, Yhâng é a dingmán é hkyô lé
 myit bun bê nghut ri.

⁶ Yhang kut byî é eq rajung za, yhang lé tau kut byi
 keq; Yhang kut bê muzó eq rajung za, yhang
 lé í tú taû kut keq.
 Yhang nyhó byî é góm má, í tú taû nyhó byi
 keq.

⁷ Yhang gi, yhumsing gùng lé yhumsîng lhoq gyaú
 yû luî, ladu lai shoq ngón kún nhang é í,
 wûhke jamjau hkyô eq iyon hkyô myo myo,
 yhang lé taû byi keq.

Hkâsu mù gâ le, yhang gi, yhâng é myit má,
 'Ngò gi, hkohkâm myhí nghut lhê; ngò gi,
 chuimó a nghut;
 hkâ-nhám le iyon hui râ a nghut.' ga gumrong
 nyi ri.

⁸ Haû mù luî, yhâng é wúm nghu é shî hkyô, iyon
 hkyô eq mutmó gyó hkyô gi,
 ra-nyí bui má za, yhâng chyáng jé râ nghut lhê.
 Hau htoq agó, yhang gi, myî èq nyhê hkyô pyâm é
 lé hui râ nghut lhê;

hkâsu mù gâ le, yhang lé jéyáng é, haû Yhumsîng
Garai Gasang gi, wum-o a-tsam bò Sû nghut
ri.

⁹ Haû yhang eq rahá myiwe yuqgè nyi zô lhum
hkyô kut shut é eq yhâng é ladu lai shoq ngón
kún hkyô má bo lom é, haû myidàm htoq mâ é
hkohkam pé gi, yhang lé nyhê hkyô é myihkau lé
myàng kôjáng, ngaubyi ngau-nhap eq iyon yôn é
huî bùm kó râ nghut lhê.

¹⁰ Yhangmoq gi, yhang no jamjaû nyi é lé wú
gyuq kôluí, we we má yap to kômù,
'Hkik é myuq mó, a-tsam bo é Babelon gi, dingnyé
wó ri-nhung!

Dingnyé wó ri-nhung! Hkyíng hkum ralhum má
za, dam byí é hkyô gi, náng chyáng jé bu-
nhung!'

ga luí, tâi garu kó râ nghut lhê.

¹¹ Myidàm htoq mâ é hpugá byu pé gi, yhang é
yanmai, ngaubyi ngau-nhap é eq iyon yôn é hui kó
râ nghut lhê; hkâsu mù gâ le, yhangmoq é gài zè lé,
ó yuq le a wuì byi lo kô é yanmai nghut ri.

¹² Gài zè haú pé gi, hîng, ngùn, lungsêng eq palhé,
nú-nhâm é pán, me me dut é pán, láí hkyíng eq zam
zam ne é pán; namngón jung sik ajung jung, maguí
zuí lé saí é, gùloq hpaû jung sik lé saí é, gyi lé saí é,
shamtoq lé saí é, luq hpyû lé saí é jung ajà jà nghut
ri.

¹³ Hau htoq agó, changhpyik gâm, xunmân,
namngón jung, mura, loban, tsibiyiq wing, tsanlun
xú, mún eq sungsô, nojûng eq sau, myang eq
myanglhêng pé; byù é gungdu eq asak pé nghut ri.

¹⁴ Yhangmoq gi, 'Nàng myit ô nau nyi é hkyô pé
gi, náng chyáng mai gâng ló byuq bê nghut ri. Nàng

wó é sùt é hkyô eq hkikhkam é hkyô pé banshoq gi, byuq byuq bê nghut luî, hkâ-nhám le dum wó taû yù rà a nghut.' ga taí kó rà nghut lhê.

¹⁵ Gai zè haú pé lé ung luî, yhâng chyáng mai sutzè wó yu é byù pé gi, yhang hpuzô é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,

¹⁶ 'Nú-nhâm é pán, me me dut é pán eq zam zam ne é mebu wut luî, hîng, lungsêng eq palhé pé lé
mhôn tô é myuq mó gi, dingnyé wó ri-nhung!
Dingnyé wó ri-nhung!

¹⁷ Hkyíng hkum rahkum má za, haû-í yhang wó é sutzè pé htên byoq byuq bu-nhung!' ga taí kó rà nghut lhê.

Wuì-sanghpo agyì yuq hkangmó eq wuì-sanghpo mai jón wún é bang banshoq, wuì-sanghpo hkâng bang eq wuìshuq lung-aû mai wam baú hkyô wó yu é bang banshoq gi, we we má yap to kômù,

¹⁸ myuq haû nyé gyó nyi é myihkau lé myàng kôjáng, 'Myuq mó shî eq pûng é myuq gi, hkâmá joq shirâ lhú?' ga taí garu kó rà nghut lhê.

¹⁹ Yhangmoq gi, yhumsing é ulhum má hpuil-hup kyaq gyun mù, ngaubyi ngau-nhap eq iyon yon uchyang,

'Myuq mó gi, dingnyé wó ri-nhung! Dingnyé wó ri-nhung!

Wuìshuq lung-aû má wuì-sanghpo pé wó é bang gi, yhâng é sutzè pê é yanmai, sutzè wó bum akô.

Nghut kôlhang, hkyíng hkum rahkum má za, htên byoq hkyô gi, yhâng chyáng jé bu-nhung!

20 Mauhkûng ê, yhang é yanmai hkye gabú aq!
 Sân-yûng bang, lagyô pé eq myiqhtoî pé ê,
 hkye gabú keq!

Hkâsu mù gâ le, yhang, nungmoq lé kut é eq
 rajung za, Garai Gasang gi, yhang lé jéyáng
 bê nghut ri.'

ga taí kó râ nghut lhê." gâ ri.

21 Hau htâng, wum-o a-tsam mó bo é maumang
 lagyo rayuq gi, luqluí long mó sù é luqgok racham
 waq toq yû mù, wuìshuq lung-aû má dú hkyô kat
 luî, taî é gi,

"Haû Babelon myuq mó gi, haû su kut wum kat dú
 hkyô pyâm é hui râ nghut luî,
 hkâ-nhám le dum myàng râ a nghut lo.

22 Haû tíng bat é bang, dat gó dat ye é bang, sampyí
 mut é bang eq tut mut é bâng é htê lé,
 náng chyáng hkâ-nhám le dum wó gyo lo râ a
 nghut.

Loq hpaqchyî ajung jung kûng é byù lé, náng
 chyáng hkâ-nhám le dum myàng lo râ a
 nghut.

Luqluí luí é htê lé, náng chyáng hkâ-nhám le dum
 wó gyo lo râ a nghut.

23 Haû myibung duq é myishâm lé, náng chyáng
 hkâ-nhám le dum wó duq lo râ a nghut.

Myisik lusik é htê lé, náng chyáng hkâ-nhám le dum
 wó gyo lo râ a nghut.

Náng é hpugá byû pé gi, mingkân é byù mó pé
 nghut ri.

Náng é myoqheq hpaqchyi èq mingdán banshoq
 mâ é bang lé, hkyô shuí nghoq bê nghut ri.

24 Haû myiqhtoî pê é sui, sân-yúng bâng é sui eq
 myidàm htoq má sat hui bang banshoq é sui
 pé gi,
 yhâng chyáng chyat byu-myàng bê nghut ri."
 gâ ri.

19

Haleluya!

¹ Hau htâng, mauhkûng htoq má, byù ajùm ayò
 garû é htê mó su gâ é lé, ngò wó gyô é gi,

"Haleluya!*

Hkyi yù hkyô eq hpungwup shingkang, a-tsam gi,
 nga-nhûng é Garai Gasang eq sêng é nghut
 lhê.

² Hkâsu mù gâ le, Yhang tarâ jéyáng é hkyô gi,
 tengmán é eq dingmán é yanmai nghut ri.

Yhang gi, myidàm htoq mâ é bang lé, haû yhâng
 é ashop é dông gungsho zùm yap é hkyo eq
 mara kut shut nhang é shiwa myhí mó lé,
 mara byi lui,

Yhâng é dui-nhâng zoshâng wuì é sui yuichyîn
 dam byi bu-nhung ô!"

gâ ri.

³ Dum radàm, yhangmoq taî garu kô é gi,

"Haleluya!

Myuq hau é myihkau gi, pyat dedu ahtum abyuq
 ru íng doq nyì sháng gaq ô!"

gâ bum akô nghut ri.

* **19:1** *Haleluya* gâ é gi, Hebre myíng dông, "Yhumsíng Garai Gasang lé hkya-on kungton lhê" gâ é dang nghut ri.

⁴ Haû suwún í xe myi yuq eq dui é dusak myî du gi, haû hkohkâm-tanghkuq má zung tô é Garai Gasang lé paî gop luí, noqkuq uchyang, "Amen, Haleluya!" ga, taî garû bum akô.

⁵ Haû hkûn, "Garai Gasâng é dui-nhâng zoshâng wuî nghut é, yhang lé gyuq hkunggâ é tiq ko banshoq bang è! Nga-nhûng é Garai Gasang lé, hkya-on kungtôn keq ô." ga é htê, haû hkohkâm-tanghkuq mai htoq lo ri.

⁶ Hau htâng, byù ajùm ayo é htê su ga, wuî myo myo mying hûm é htê su ga, maugum mó é htê su ga, taî garû é htê lé ngò wó gyô é gi, "Haleluya!

Hkâsu mù gâ le, wum-o a-tsam dik shoq bò Sû nga-nhûng é Yhumsîng Garai Gasang gi, up nyi ri.

⁷ Nga-nhúng gi, ngón gabú luí, Yhâng é hpungwup shingkang lé lhoq gyaú sháng ô!

Hkâsu mù gâ le, haû Sauzo myiháng poî gi, jé bê nghut luí, Yhâng é myisik gi, rì rì mhôn to bê nghut ri.

⁸ Sân-yúng duq wik nú-nhâm é mebu le, wut râ matú, Yhang lé byî to bê nghut ri." ga ri. (Nú-nhâm é mebu haû gi, sân-yúng bang kut é dingmán é muzó nghut ri.)

⁹ Hau htâng, maumang lagyo gi, ngo lé, "'Haû Sauzô é myiháng zoshuq poî má ji yu é hui bang gi, hkungsô wó nyi ri.' nghû ká aq." ga taî luí, "Dang shí pé gi, Garai Gasâng é tengmán mung-dang yhang nghut lhê." ga xoq taî ri.

10 Haú hkûn, ngò gi, yhang lé noqkuq râ nghû, yhâng é hkyî wang má paî gop kat é nghut lhê. Nghut kôlhang, yhang gi, "Haú su hkâkut! Ngò gi, nàng eq haú Yesuq é saksé lé hkâm é náng gumang wuì eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoî é Woi-nyí é myit dông nghut ri." ga, ngo lé taî hkûm ri.

Myang Hpyû Ji To Su É Hkyô

11 Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haú má jî tô é gi, Lhumzui eq Tengmán gâ é Sû nghut ri. Yhang gi, tengmán é dông tarâ jéyáng luî, majan zan Sû nghut ri.

12 Yhâng é myoqjí gi, myishâm su dut mù, Yhâng é ulhum má gi, janmaú myo myo tsûng tô ri. Yhang mai lai luî, ó yuq le a bo sê é myìng, Yhâng chyáng kâ tap tô ri.

13 Yhang gi, sui má jum yù bê nghut é buhîng radung wut to luî, Yhâng é myìng gi, Garai Gasâng é mungdang gâ ri.

14 Haú mauhkûng gyè pé gi, hpyu é eq sanséng nú-nhâm é mebu wut mù, myang hpyû ji kôluî, Yhâng htâng má châng bum akô nghut ri.

15 Byù myû haú pé lé zan râ matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up râ nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq lé pyik râ nghut lhê.

¹⁶ Hkohlkâm pê é Hkohlkâm eq yhumsing pê é Yhumsing gâ é mying gi, Yhâng é buhâng eq Yhâng é tangbau má kê tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat mâ é nghoqzô pé banshoq lé, "Lé keq, Garai Gasâng é zoshuq pôi mó matú, lé zup zing keq;

¹⁸ haú hkûn, nungmoq gi, hkohlkâm pê é, gyezaú pê é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jùn pê é, byù mó byù zo pé lhunglhâng é gungsho pé lé, myàng zo kó râ nghut lhê." ga, htê mó èq wut garú tái ri.

¹⁹ Hau htâng, haú tân jung dusak eq myidâm htoq mâ é hkohlkâm eq yhangmoq é gyezô pé gi, haú myang htoq má jî to Sû eq Yhâng é gyezô pé lé, majan zan râ matú chôm zing bùm kê é lé, ngò myang ri.

²⁰ Nghut kôlhang, haú tân jung dusak gi, chyup yu é hui bekô nghut ri; hau htoq agó, haú tân jung dusak é masat lhô lé hkam yù luí, yhâng é alhô lé noqkuq é bang lé, mhaú zo râ matú, tân jung dusak hau é gunglik dông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duí gù dú hkyô kat é hui bekô nghut ri.

²¹ Haú myit gyó tô é bang gi, myang gûng má jî to Su é nhut mai htoq lo é sham èq sat pyâm é hui bekô nghut luí, nghoq pé lhunglhâng gi, haú bâng é gungsho lé, gyi gyi dau dau myàng zô bùm bekô nghut ri.

Rahkyîng Zàn

¹ Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhâng é loq má chûng mù, mauhkûng mai gyó lé lo é lé, ngò myang ri.

² Yhang gi, natzau eq Tsadán nghut é, a-nham lhê é lhangmuì gâ é manjung lé, zanwut rahkyîng lhûng to râ matú, chyup tuí yù bê nghut ri.

³ Haû mù, maumang lagyo haû gi, rahkyîng zàn a byíng shî é gyoro má, manjung haû, byù myû pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luî, zoq myhî to mù, hau é ahtoq má dizik htûng tô ri. Haû rahkyîng zàn lai eq, yhang lé, ra yoq zo hpông htoq kat ra râ nghut lhê.

⁴ Ngò gi, haû tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haû Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haû tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yû bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri.

⁵ Haû gi, sâng-hî dâm dum dui toq é hkyô nghut ri. (Shi byuq bê myit gyó tô bang gi, rahkyîng zàn haû a byíng byíng wó dum dui toq kó râ a nghut.)

⁶ Sâng-hî dâm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû râ shi é hkyô gi, haú bang lé up râ

ahkáng wó é a nghut; haú bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lâ.

Tsadán Htên Byoq Huí É Hkyô

⁷ Rahkyîng zàn haú lai jáng, Tsadán gi, htóng mai nhang htoq kat é hui luí,

⁸ majan zan râ matú, myidàm htoq myi chyûn má nyi é, Goga eq Magoga gâ é byù myû pé lé mhaú shuí tsîng yù râ ga, htoq ê râ nghut lâ. Byù haú bang gi, wuîshuq lung-aû yàm mâ é semuí myhó myo kó râ nghut lâ.

⁹ Yhangmoq gi, maumyî htunghtáng hkap shoq chôm yán doq lò kômù, haú Garai Gasâng é byu pé nyi é dap nghut é, Garai Gasang chytidap é myuq lhînghkyuq má, lé lóm tô bùm bekô. Nghut kôhlang, mauhkûng mai myi gyó lô luí, yhangmoq lé nyhé hkyô pyâm bê nghut ri.

¹⁰ Haú tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haú le dú hkyô pyâm é hui bê nghut ri. Yhangmoq gi, nyí, myín, pyat dedu ahtum abyuq wuîhke jamjau hui zô nyi kó râ nghut lâ.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq hpyû mó ralhum eq haú má zung tô é Sû lé, ngò myang ri. Haú mauhkûng eq myigùng gi, Yhâng é hí mai h pang ló bê nghut mù, yhangnhik é matú jowò a joq lo nghut ri.

¹² Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotû laiká buk le, hpông tô ri. Haú shi byuq bê bang gi, yhumsing kut é eq rajung za, laiká buk pé má kê tô é đông, tarâ doqdân é huí bùm bekô nghut ri.

¹³ Haú hkûn, wuìshuq lung-aú gi, yhang má lúng tô é, shi byuq bê bang lé ap byi luí, haú shi é hkyô eq Moming le, yhangnhik chyáng lúng tô é, shi byuq bê bang lé ap byi akô nghut ri; yuq hkgámó gi, yhumsing kut é eq rajung za tarâ doqdân é hui bekô nghut ri.

¹⁴ Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haú gi, í dâm nghû râ shi é hkyô nghut lê.

¹⁵ Asak jihpán laiká buk má, mying a bo é sù ó yuq nghut kôle, myi nhông haú má dú hkyô kat é hui bekô nghut ri.

21

Yerusalem Asik

¹ Hau htâng, mauhkûng asik eq myigùng asik lé, ngò myang ri; hkâsu mù gâ le, hí lhê é mauhkûng eq myigùng gi, lai ló byuq bê nghut luí, wuìshuq lung-aú le, dum joq râ a nghut lo.

² Haú hkûn, Chyoiyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yù luí, Garai Gasâng chyáng mã é nghut mù, mauhkûng mai gyó lé lo é lé, ngò myang ri.

³ Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuí, Garai

Gasâng é nyì jowò gi, xângzo byu pé eq rahá nghut luí, Yhang gi, yhangmoq eq rahá nyi nyi râ nghut lhê. Yhangmoq gi, Yhâng é byu pé dut râ nghut luí, Garai Gasang yhang, yhangmoq eq rahá nyi mù, yhangmoq é Garai Gasang dut râ nghut lhê.

⁴ Garai Gasang gi, yhangmoq é myoq mâ é ngaubyi lunglháng lé, sut pyám byi râ nghut lhê. Htângnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô nghû é joq râ a nghut lo; hkâsu mù gâ le, hí lhê é hkyô pé gi, laí ló byuq bê nghut ri." gâ ri.

⁵ Haû hkohkâm-tanghkuq má zung to Sû gi, "Wú aq, jung hkanmó lé, Ngò asik kut nyí bê nghut lhê." ga taí luí, "Shî lé kâ to aq, hkâsu mù gâ le, dang shí pé gi, lumgíng é dang eq tengmán é dang nghut lhê." ga taí ri.

⁶ Hau htoq agó, Yhang gi, "Haú pé gi, ban kut bê. Ngò gi, Alpha eq Omega nghut lhê; Sâng-hi Awang eq Lô Htáng Sû le nghut lhê. Wuì shít sù lé gi, ahpau a dúng é za, asak wuibúm mâ é uchyam lé, Ngò byi huq râ nghut lhê.

⁷ Wó ung é sù ó yuq nghut kôle, Garaî é silí wunlí haú pé banshoq lé sîng râ nghut mù, Ngò gi, yhâng é Garai Gasang dut luí, yhang gi, Ngá zo dut râ nghut lhê.

⁸ Nghut kôlháng, gyuq myit bò bang, a lumjíng bang, acháq achyut dut bang, byù sat bang, ashóp é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lunglhâng é jowò gi, haû hang myi duq nyi é nhông nghut râ nghut lhê. Haû gi, í dâm nghû râ shi é hkyô nghut ri." ga ngo lé taí ri.

⁹ Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq mâ é rayuq gi, lé mù, "Lé aq, haú Sauzô é yhangmyi gâ é myisik lé, ngò tûn shit râ nghut lhê." ga ngo lé tai ri.

¹⁰ Hau htâng, yhang gi, ngo lé Woi-nyí mai bùm myhâng mó ralhûm má shuî jé luî, Garai Gasâng chyáng mâ é nghut mù, mauhkûng mai gyó lé lo é, haú Chyoiyúng Myuq gâ é Yerusalem lé tûn shit ri.

¹¹ Myuq haú gi, Garai Gasâng é hpungwup shingkang hû é htoq agó, haú maubó gi, hpaú dik é huhpé lungsêng su dut luî, myoqjâm su sân-yúng ri.

¹² Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myû raxe í hu é myìng lé, hkum haú pé má kê tap to bum ri.

¹³ Hkum haú pé gi, buihtoq hkyam shut sùm lhum, buiwàng hkyam shut sùm lhum, maupyí shut sùm lhum, mautsûng shut sùm lhum kut hpông tô ri.

¹⁴ Myuq xêwâm haú gi, awang raxe í lhûm èq hi tô é nghut luî, awang haú pé má, Sauzô é lagyo raxe í yuq é myìng dap tô bum ri.

¹⁵ Haú ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hîng jâm-yang ralhûm chung tô ri.

¹⁶ Myuq haú gi, myi chyûn dut mâ é nghut luî, hîng hpyang làm hpyang rawuí wuí za dut mâ é nghut ri. Maumang haú gi, myuq lé jâm-yang hau èq kê wú é hkûn, hîng hpyang, làm hpyang, myhâng

hpyang banshoq 1400 déng* kô bo ri;

¹⁷ yhang gi, haû byù kê é jung eq wuí é maumang lagyô é kê jung lé chûng mù, myuq xêwâm lé ké wú é hkûn, rasho myí xê myí dúng bo ri.

¹⁸ Myuq xêwâm haû gi, huhpé lungseng èq saî é nghut ri; myuq gi, hîng gyíng èq saî é nghut mù, myoqjàm su yhang sân-yúng ri.

¹⁹ Myuq xêwâm haû é awang pé gi, hpau jung lungsêng ajung jûng èq mhôn tô é nghut ri. Sâng-hî lhum gi, huhpé lungseng èq, í lhum nghû râ gi, nila (mauhkûng nyuì su dut jung) lungseng èq, sùm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyuì nyuì é jung) lungseng èq,

²⁰ ngo lhum nghû râ gi, nyhaú myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaû lhum nghû râ gi, utohpaya (bó huí huí é jung) lungseng èq, raxê lhum nghû râ gi, mahuya nyuì lungsêng èq, raxe ralhum nghû râ gi, wakintu (mhan-haq nyuì eq mauhkûng nyuì nyhô tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri.

²¹ Haû myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saî é nghut ri. Haû myuq é hkyô mó gi, hîng jet èq saî é nghut luí, myoqjàm su duq san é hkyô nghut ri.

* **21:16** 1400 déng gi, Grik pê é stadia 12000 kô nghut ri.

²² Ngò gi, myuq haú má noqkuq yhúm joq é lé a myàng, hkâsu mù gâ le, haú wum-o a-tsam dik shoq bò Sû Yhumsing Garai Gasang eq Sauzo gi, myuq hau é noqkuq yhúm nghut nyi é yanmai nghut ri.

²³ Haú Garai Gasang é hpungwup shing kang gi, myuq haú má duqbó byi é htoq agó, Sauzo gi, myuq hau é myibung nghut é yanmai, myuq haú má gi, bui eq lhamó tsô byi a ra nghut ri.

²⁴ Haú byù myû pé gi, myuq haú duqbó é hkaú má hkyô wó so kó râ nghut lhê; haú myidàm htoq mâ é hkohkam pê gi, yhangmoq é hkikhkâm hkyô lé, myuq haú má yù lé kó râ nghut lhê.

²⁵ Myuq haú má gi, myín nghû é a joq é yanmai, myuq hkum myhî é le joq râ a nghut lo.

²⁶ Haú byù myû pê é hpungwup shing kang eq aróng lé, myuq haú má yu lé kó râ nghut lhê.

²⁷ Myuq haú má, a sansêng é hkyô haí le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wàng râ a nghut; haú Sauzô é asak jihpán laiká buk má myìng bo é bang za wó wàng râ nghut lhê.

22

Asak Wuì Mó Lâng

¹ Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaú mâ é hkyô mó gûng dông yui ló é, myoqjâm su sân-yúng é asak wuì mó lâng lé, maumang lagyo haú, ngo lé tân shit ri.

² Wuilàng í hpoq é má, ashi raxe í myû zuí é asak shigâm yuq tô é nghut luí, lhohkyap hkangmó ashi

zuí ri. Hau htoq agó, shigâm haú pé mâ é ahaq pé gi, byù myû pé lé yâ gè rá matú nghut ri.

³ Nhîng é haí le a joq lo rá nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyí rá nghut mù, Yhâng é dui-nhâng zoshâng wuì gi, Yhang lé noqkuq dojaú kó rá nghut lhê.

⁴ Yhangmoq gi, Yhâng é myoqdong lé myàng kó rá nghut é htoq agó, yhangmoq é ngelang má, Yhâng é myìng kê tap é hui kó rá nghut lhê.

⁵ Myín nghû é le joq rá a nghut lo. Myibung duqbó byí é le, buì tsô byí é le, yhangmoq ra kó rá a nghut lo, hkâsu mù gâ le, haú Yhumsîng Garai Gasang gi, yhangmoq lé duqbó byí nyí rá nghut lhê. Hau htoq agó, yhangmoq gi, pyat dedu ahtum abyuq up nyí kó rá nghut lhê.

⁶ Maumang haú gi, ngo lé, "Dang shí pé gi, lungíng é dang eq tengmán é dang nghut lhê. Myiqhtoì pé é woi-nyí lé up é Yhumsîng Garai Gasang gi, adê myáng má ðut lò rá hkyô pé lé, Yhâng é dui-nhâng zoshâng wuì lé tân shit rá matú, Yhâng é maumang lagyo lé nhang kat é nghut ri." ga taí ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô rá nghut lhê! Laiká shí má bo é myiqhtoì dang pé lé châng kut é sù gi, hkungsô wó nyi ri."* gâ é lé, ngò wó gyô ri.

⁸ Haú hkyô pé lé wó myâng wó gyô é sù gi, ngò Yohan nghut lhê. Ngò gi, haú hkyô pé lé wó myâng wó gyô é hkûn, ngo lé, shí hkyô pé tân shit é

* 22:7 Dang shí hkun gi, Yesuq taí é nghut lhê.

maumang lagyô é hkyî wang má noqkuq râ matú paî gop é nghut lhê.

⁹ Nghut kôlhang, yhang gi, ngo lé, "Haû su hkâkut! Ngò gi, nàng eq le, náng é gumang myiqhtoî pé eq le, laiká shî mâ é mungdang pé lé châng kut é lhunghâng bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taî ri.

¹⁰ Hau htâng, yhang gi, "Laiká shî má bo é my-iqhtoi dang pé lé, hkâzaú to lo, hkâsu mù gâ le, haû ahkyíng gi, chyâng lò bê nghut ri.

¹¹ A dingmán é sù gi, a dingmán é dông xoq kut nyî sháng gaq; a sansêng é sù gi, a sansêng é dông xoq dut nyî sháng gaq; dingmán é sù gi, dingmán é dông xoq kut nyî sháng gaq; chyoiyúng é sù gi, xoq chyoiyúng nyî sháng gaq." ga ngo lé taî kyô ri.

¹² "Wú keq, ngò gi, a myáng má jé lé lô râ nghut lhê! Ngò gi, yuq hkanmó lé, yhumsíng kut é eq rajung za byi râ shigyaú chyunghuq chung tô lhê.

¹³ Ngò gi, Alhpa eq Omega nghut lhê, Sâng-hi eq Jihtúm nghut lhê, Sâng-hi Awang eq Ló Htáng Sù le nghut lhê.

¹⁴ Asak shigâm má jé râ eq myuq hkaû shut hkúmdong mai wó wang jé râ ahkáng wó yû shoq, yhumsíng é buhíng lé chí sân é bang gi, hkungsô wó nyi ri.

¹⁵ Shinggan má gi, hkui dông nyi é bang, my-oqheq hpaqchyî kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaû é hkyô lé ô naù luî châng kut é bang lhungháng nyi bum akô nghut ri.

16 Ngò, Yesuq gi, haû noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haû duqbó é Bó-myhû le nghut lhê. "† gâ é lé, ngò wó gyô ri.

17 Haû Woi-nyí eq myisik gi, "Lé aq!" gâ akô. Haû wó gyô é sù gi, "Lé aq!" ga sháng gaq. Wuì shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wuì lé, shuq sháng gaq.

18 Laiká shî má bo é myiqhtoi dang pé lé wó gyô é bang yuq hkangmó lé, ngò sidiq byî é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shî má kê tô é wúm pé lé jé nhâng râ nghut lhê.

19 Myiqhtoi laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kê tô é asak shigâm eq chyoyúng myuq mâ é yhang eq sêng é gû lé, yu pyám byi râ nghut lhê.

20 Shí hkyô pé lé saksé hkám byî é Sù gi, "Nghut bê, Ngò gi, a myáng má jé lé lô râ nghut lhê." ga taî ri.

Amen. Yhumsîng Yesuq ê, lé lô aq ô!

21 Haû Yhumsîng Yesuq é jeju gi, Garai Gasâng é byu pé chyáng joq nyî sháng gaq ô! Amen.

† 22:16 Dang shí hkun gi, Yesuq taî é nghut lhê.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

23f9fc55-a8a4-59ef-9513-707ec336b0ee